

Bàu Lem tiaq
MỠC
 Achìh Bìac Chuaq Jêxu Broq Wa Hnài
Bàu Patô Adroi

Hiniq wa Bàu Xèm Da Sech:

'Bài craq Tagop Hadròih calah nèh mòiq manoh doi Mỗc achìh hlài bàu hnài da Pêtrô. 'Màng aih sech cô i hiniq Mỗc.

Mangai Achìh wa Hanam Achìh:

Mỗc con calô da Mari (Bìac Yiang Hadròih 12:12). Haq hadai oh daq da Ba-na-ba (Cô-lô-se 4:10). Haq khoi lam pajùm ca Paulô wa 'Ba-na-ba yàng baxèm jò wa haq anoi hnài Bàu Lem. Paulô anoi 'noh hiniq Mỗc broq bua da haq wa jùp haq jò ôi ta phôq Rôma. Mỗc sech baxèm da 4 toq Sech Bàu Lem wa khoi achìh hanam 55 Atiq C.

Bàu Anoi:

'Nhac ca Sech Mỗc yi đêq diq sech ma 'noi, Mỗc achìh bàu ma geo am ca mangai Rôma loq tàng. Haq hadai achìh bàu yi nhet aih Chuaq Jêxu Haq Con Boc Plình. Haq anoi 'noh bìac halac Chuaq Jêxu broq. Bàu bàu achìh anoi 'noh bìac loh ta tùang atiq lùch da can rìh Chuaq Jêxu ta cởng taneh. Lùch sech i bàu anoi 'noh can cachìt wa can rìh hlài da Chuaq Jêxu.

Rìm 'Nat:

1. Bìac baxèm da Bìac broq Chuaq Jêxu: 1:1–13
2. Bìac broq da Chuaq Jêxu ôi ta gùng Ga-li-lê: 1:14—6:29
3. 'Bài yàng Chuaq Jêxu wìh lùì enh gùng Ga-li-lê: 6:30—9:32

4. Bìac broq da Chuaq Jêxu yàng pulùch ta gùng Ga-li-lê: 9:33–50
5. Bìac broq da Chuaq Jêxu ta Judia wa cròng Jôđan: 10:1–52
6. Bìac nan xa da Chuaq Jêxu: 11:1–15:47
7. Bìac Rìh Hlài enh cachìt da Chuaq Jêxu: 16:1–20

Bìac Broq da Jon 'Baptit

(*Mat 3:1–12; Luc 3:1–9,15–17; Jon 1:19–28*)

¹ Baxèm Bàu Lem da Chuaq Jêxu Crich, Con Calô Boc Plình. ² Tìah ca khoi achìh ta sech Êsai mangai capoch thai Boc Plình:

“Cô Au thê dèh hapǒng lam adroi ca ìh,

Haq padon trong am ca ìh.”[☆]

³ “I bàu creo ta ðùng hawit,

thê ðìq ca con mangai wìh wìa ma lem padon glàm

Chuaq jò Haq lam trùh.”[☆]

⁴ Jon khoi trùh òi ta ðùng hawit, haq rai hnài rai 'baptem, thê cađac dèh manoh broq tôiq, ðòiq Boc Plình baxǒng

tôiq. ⁵ ðìq ca jàn ta gùng Judia wa ta phôq Jê-ru-sa-lem lam trùh ti haq. Wì pa'noh dèh tôiq lòi chiùq haq 'baptem

ta diac Jôđan. ⁶ Jon caxùnh eo broq xam xàc lǒcđã, cật ca'nam xam caxi akia. Haq caq líp tùc wa diac xùt ta rôm.

⁷ Jon hnài: “Mangai ma trùh atìq ca au, i cwìang itai càn yi hnao ca au, au ùh ðang ca hacùn cràng ðòiq ðǒih caxi

jai Haq. ⁸ Au 'baptem ca pì xam diac, mahaq Haq broq 'baptem ca pì xam Yiang Hadròih.”

Chuaq Jêxu Chiùq 'Baptem

(*Mat 3:13–17; Luc 3:21–22*)

⁹ 'Bài hì aih, Chuaq Jêxu lam enh phôq Na-xa-ret, gùng Ga-li-lê. Haq chiùq Jon 'baptem ta diac Jôđan. ¹⁰ Jò tǒc enh

[☆] 1:2 1:2 Mal 3:1. [☆] 1:3 1:3 Êsai 40:3.

diac, Haq hnoq Plình tapèh wa Yiang Hadròih loh jràp ti chac Haq tiah ca chìm trù. ¹¹ I bàu enh Plình doi: “Cò Con Calô Au loq waq, Haq lem manoh Au rìm trong.”

Chuaq Jêxu 'Blêq Bìac Padô 'Nùt
(*Mat 4:1-11; Luc 4:1-13*)

¹² Tajòì 'mòi Yiang Hadròih thê Chuaq Jêxu lam nòi ðùng hawit. ¹³ Ta aih Haq òi ti ngè rôm 40 hì, can kiac Satan lam trùh chaq trong padô 'nùt Haq. Atìq ca aih i 'bài 'bình plình trùh patìh bìac ca Haq.

Chuaq Jêxu Baxèm Anoi Hnài ta Ga-li-lê
(*Mat 4:12-17; Luc 4:14-15*)

¹⁴ Khoi ca Jon 'bìq clêh ta tù, Chuaq Jêxu lam trùh ta gùng Ga-li-lê, anoi hlài Bàu Lem Boc Plình. ¹⁵ Haq doi: “Khoi trùh jò, Diac Plình khoi haten, cađac dèh manoh broq tôiq, lùì canòm Bàu Lem beq.”

Pôn Ngai, Mangai Hốc Tiaq Baxèm
(*Mat 4:18-22; Luc 5:1-11*)

¹⁶ I mòi q hì Chuaq Jêxu lam ti 'bò diac raxìq Ga-li-lê, hnoq Simôn wa Anrê, oh haq 'nang tang hlàm ta diac, ma jah 'màng aih wa aih mangai ranang ca. ¹⁷ Chuaq Jêxu creo ca wa: “Lam tiaq Au beq, Au broq chòp wìa mangai dèch mangai.” ¹⁸ Tajòì 'mòi wa cađac hlàm lam tiaq Haq.

¹⁹ Lam tam toq 'biaq hòm, Haq hnoq Jacò con Xê-bê-đê wa oh haq, Jon, ha'ngui hminh hlàm ta bong. ²⁰ Tajòì 'mòi Haq creo ca wa. Wa cađac dèh baq wa 'bài bua ma ranang ca òi hlài ta bong, lam tiaq Haq.

Chuaq Jêxu Hnan Đac Can Kiac
(*Luc 4:31-37*)

²¹ Atìq ca aih, Chuaq Jêxu wa 'bài mangai hốc tiaq Haq lam ta phòq Ca-bê-na-um. Wop Hì Sabat, Haq mùt ta hnem tagop hnài wì. ²² 'Bài mangai òi ta hnem tagop

hamàih ta manoh jò wì tàng Haq hnài, ma jah 'màng aih bàu Haq i cwàng itai, crài ca 'bài thài ranenh. ²³ Jò aih òi ta hnem tagop i mòiq ngai i kiac òi ta chac, haq cachech bàu dèh doi: ²⁴ “Ôi Chuaq Jêxu Mangai Na-xa-ret! Ìh enh broq ca nhèn 'màng leq? Ìh trùh òi jêh đac nhèn 'mòh? Au loq Ìh Cabô. Ìh Con Calô Boc Plình!”

²⁵ Chuaq Jêxu gràm bàu doi: “Àt ma hatenh haq, loh khoi enh mangai cô beq!” ²⁶ Can kiac cachech bàu dèh rapàt mangai aih tacro, khoi èh loh khoi enh mangai aih.

²⁷ Rìm ngai hnoq bìac aih, wì hamàih, bòch dabau: “Bìac cacleq 'màng cô, trong hnài ma neo 'mòh? Mangai cô joq i cwàng itai, can kiac xôq iu tiaq bàu Haq.” ²⁸ Wì anoi hlài bìac Chuaq Jêxu ma broq aih jàp ta gùng Ga-li-lê.

Chuaq Jêxu Broq Brêh Miq Mai Pêtrô

(Mat 8:14-17; Luc 4:38-39)

²⁹ Loh enh hnem tagop, Chuaq Jêxu wa mangai hõc tiaq Haq lam ti Jacò wa Jon mùt ta hnem Simôn wa Anrê. ³⁰ Miq mai Simôn ùh hrõc tôq chac cùi ta jùang. Tajòi 'mòì wì doi ca Chuaq Jêxu. ³¹ Haq lam trùh ti jùang, rùp tì mangai ùh hrõc dèch haq ha'ngui. Tajòi 'mòì haq brêh. Haq yòng patìh ca wì.

Chuaq Jêxu Broq Brêh Bàc Ngai

(Mat 8:16-17; Luc 4:40-41)

³² Trùh jò mat mahì ten mùt, wì 'ràng 'bài mangai ùh hrõc wa 'bài mangai i kiac òi ta chac, trùh ti Haq. ³³ Dìq ca mangai ta phòq lam gòm jang 'mang hnem. ³⁴ Haq broq brêh ca mangai ùh hrõc, wa drùh đac can kiac. Haq ùh am can kiac capoch cleq, ma jah 'màng aih kiac khoi loq Haq Cabô.

³⁵ Jò ten 'ngah, Haq loh lam ta nòi hawit waiq khàn. ³⁶ Simôn wa bua haq, lam chaq Chuaq Jêxu. ³⁷ Jò wì chaq hnoq Haq wì doi: “Rìm ngai 'nang chaq Ìh.”

*Chuaq Jêxu Anoi Hnài ta Ga-li-lê**(Luc 4:42-44)*

³⁸ Haq doi: “Beq bèn lam mùt ta 'bài phôq haten ta cô, ðòiq au anoi hnài Bàu Lem ca wì haq, taiq biac cô raq Au ma khai trùh.” ³⁹ Èh Haq lam jàp gùng Ga-li-lê anoi hnài wì òi ta hnem tagop wa drùh đac can kiac.

*Chuaq Broq Brêh ca Mangai Bacùn**(Mat 8:1-4; Luc 5:12-16)*

⁴⁰ I mòiq ngai bacùn trùh ti Chuaq hacùn cràng xìn Haq doi: “Chuaq ôi! Tàng Ìh enh, Ìh broq au jah brêh.”

⁴¹ Chuaq Jêxu tamèt ðiq ca manoh xa-öch ca haq, dèch tì bèq haq, rai doi: “Au enh hai! Brêh xìa beq.” ⁴² Tajòi 'mòi haq jah brêh.

⁴³ Tajòi 'mòi Chuaq Jêxu thê haq lam wa tanap ca haq: ⁴⁴ “Apaq anoi biac cô ca mangai 'noi q loq, mahaq ìh phai lam patô ðađeh ca pajàu ngan, èh ìh am ngè tadreo tiaq troi Ranenh Môise khai hnài, ðòiq wì loq ìh khai jah brêh.”

⁴⁵ Mahaq mangai cô lam palèt biac aih rìm nòi, taiq 'màng aih broq ca Chuaq Jêxu pi jah mùt ma ðahê ta phôq hòm, mahaq ep òi ti nòi hawit, wa wì loh enh rìm nòi trùh ti Haq.

2

*Mangai Pen**(Mat 9:1-8; Luc 5:17-26)*

¹ Atiq ca aih toq 'biaq hì, Chuaq Jêxu hlài ta phôq Ca-bê-na-um. Wì hìa tàng Chuaq òi ta hnem. ² Mangai jàn bàc hrìn òi enh gùng ca 'mang hnem wa trom hnem hadai pi i ca nòi òi, èh Haq yòng hnài wì. ³ I pôn ngai tòng mòiq ngai mangai pen 'ràng ca Haq. ⁴ Taiq 'bài mangai bàc hrìn wì ùh jah thia haten ca Haq. Wì pùng của hnem ta jang ca nòi Haq, khai èh 'nhùa 'noh mangai pen òi ta dradrah.

⁵ Chuaq Jêxu hnoq manoh wì lùì Haq, Haq doi ca mangai pen: “Ô con Au, tòi q lòi con khi jah baxõng.”

⁶ Mahaq i 'bài thài ranenh ha'ngui haten ca Haq, wì hèm ta manoh: ⁷ “Gleq mangai cô ma capoch 'màng aih? Mangai cô hùà capoch 'mèq ðùng Boc Plình, ma jah 'màng aih enh gùng ca Boc Plình ma i cabô i cwìang baxõng tòi q con mangai?”

⁸ Mahaq Chuaq Jêxu loq ca manoh wì. Tajòi 'mòi Haq doi ca wì: “Gleq pì ma hèm biac aih ta manoh? ⁹ Tàng doi: ‘Tòi q lòi con khi jah baxõng,’ loq doi: ‘Thê ìh yòng xùì dèh dradrah hlài beq! Doi 'màng leq ma yi xùang?’

¹⁰ Au broq brêh ca haq enh ngìa ca pì, waq ca pì loq, Au i cwìang baxõng tòi q lòi con mangai ối crõng taneh.” Khi òh, Haq doi ca mangai pen: ¹¹ “Au thê ìh yòng xùì dèh dradrah hlài ta hnem beq.” ¹² Tajòi 'mòi, haq padinh yòng xùì dèh dradrah loh lam enh ngìa ca wì. Dìq ca wì hamài h ta manoh manè apôi Boc Plình rai doi: “Bèn ùh lah hnoq biac 'màng cô?”

Chuaq Creo ca Lêwi

(Mat 9:9–13; Luc 5:27–32)

¹³ Chuaq Jêxu lam ti 'bò diac raxìq. Dìq ca mangai lam ti Haq tamàng Haq hnài. ¹⁴ Jò 'nang lam, Chuaq Jêxu hnoq Lêwi con Aphê 'nang ha'ngui gop thèq, Chuaq Jêxu doi: “Lam tiaq Au beq.” Tajòi 'mòi Lêwi yòng tiaq Chuaq Jêxu.

¹⁵ Chuaq Jêxu ha'ngui caq pua ta hnem Lêwi. I bàc ngai mangai gop thèq wa mangai bua Lêwi caq pua ti Chuaq Jêxu wa mangai hõc tiaq Haq. Ma jah 'màng aih ối ta wì haq aih, bàc ngai adroi khi tiaq Haq. ¹⁶ 'Bài thài ranenh wa Pha-ri-si hnoq Chuaq Jêxu caq pua ti mangai gop thèq wa mangai i tòi q. Wì doi ca mangai hõc tiaq Haq: “Gleq Haq ma caq pajùm ti mangai gop thèq wa mangai i tòi q?”

¹⁷ Jò Chuaq Jêxu tàng bàu wì anoi 'màng aih, Haq doi: “Mangai ùh hróc ma nhet ca 'bacsi sì, ùh xài mangai tadêh. Au khoi lam trùh, ùh xài creó ca wì mangai ta-atoq wìh hlài, mahaq creó ca mangai i tòiç.”

¹⁸ 'Bài mangai hóc tiaq Jon wa 'bài mangai Pha-ri-si wèq ranenh rôn ca acaq waiq khàn. I mangai lam bòch Chuaq Jêxu: “Gleq mangai hóc tiaq Jon wa mangai hóc tiaq mangai Pha-ri-si diq rôn ca acaq, mahaq mangai hóc tiaq ìh ùh rôn?”

¹⁹ Chuaq Jêxu tèò: “Jò wì caq hiniang ỡng mai, 'bài bua mangai con ỡng ùh rôn ca acaq jò mangai con ỡng xôq ỏi ti wì. ²⁰ Mahaq trùh hì wì 'nong đac con ỡng lam, hì aih wì men rôn ca acaq.

²¹ “Ừ i ca mangai leq clep ha'nech bai neo 'mùt ta eo dùnh. Tàng broq 'màng aih, ha'nech bai neo dùnh eo dùnh hyah, teo hyah rai èh rai càn. ²² Hadai ùh i cabô ùc alac neo 'mùt ta 'bao akia dùnh. Tàng broq 'màng aih, alac broq ca 'bao padah, alac loh đống, 'bao ji pi wìa.”

Prot Caq 'Mau

(Mat 12:1-8; Luc 6:1-5)

²³ Hì Sabat Chuaq Jêxu wa mangai hóc tiaq Haq lam cwa ðùng i 'mau. Jò lam ti ðùng, mangai hóc tiaq Haq prot 'mau caq. ²⁴ Wì mangai Pha-ri-si doi ca Haq: “Ngan tau, 'bài mangai hóc tiaq ìh broq bìac ùh khòh broq ta hì Sabat.”

²⁵ Chuaq Jêxu padreo bàu doi: “Pì ma 'nhòq đóc bìac bùa Đawit wa 'bài mangai ma lam tiaq haq khoi broq ta hì Sabat jò haq pangot 'mòh? ²⁶ Jò 'nhòng pajàu A-bia-tha broq pajàu ha'nhèq, bùa mùt ta Hnem Boc Pình, caq 'benh ma padon ðòiç ta ca'bống, khoi èh haq am ca 'bài mangai ma tiaq haq caq. Haq khoi loq ca 'benh aih toq 'bài pajàu ma khòh caq.”

²⁷ Khoi èh Haq doi hòim: “Taiq mangai Boc Plình broq loh hì Sabat, ùh xài taiq hì Sabat Boc Plình broq loh con mangai. ²⁸ Ma jah 'màng aih Con Mangai broq craq hì Sabat.”

3

Mangai 'Yoh Tì

(Mat 12:9-14; Luc 6:6-11)

¹ Yàng ma 'noiç, Chuaq Jêxu mùt ta hnem tagop. Ta aih i mòiq ngai gu calô 'yoh tì mòiq apah. ² Wì mangai ma git ca Chuaq Jêxu gòm hanhoi ngan Haq i broq brêh ca mangai aih trom hì Sabat ùh, òòiq wì kian Haq. ³ Chuaq Jêxu doi ca mangai 'yoh tì: “Lam yòng ta'ne cô beq.”

⁴ Khoi èh Chuaq Jêxu bòch wì: “Hì Sabat, khòh broq bìac lem, loq khòh broq bìac dù, khòh dèch mangai loq khòh jêh đac mangai?” Dìç ca wì òi hatenh.

⁵ Haq loh nòih ca wì, ngan wì wa mango ca wì dìç jaç, ma jah 'màng aih Haq loq ca manoh wì cadoq. Khoi èh Haq doi ca gu calô aih: “Hnhu tì ìh beq!” Mangai aih hnhu tì, èh tì haq jah brêh. ⁶ Tajòì 'mòì mangai Pha-ri-si loh lam, hatinh ca 'bài mangai ma tiaq Hêrôt broq pađim jêh đac Haq.

⁷ Chuaq Jêxu wa mangai hóc tiaq Haq loh lam tì nòi 'bò diac raxìç, i bàc mangai jàn enh gùng Ga-li-lê, Judia, ⁸ enh phòq Jê-ru-sa-lem, gùng I-đu-mia, gùng pah tau diac Jôđan, gùng haten ca phòq Tirò wa phòq Sidôn. Wì tàng bàu wì anoi hlài bìac Chuaq Jêxu broq, èh dìç ca wì lam trùh ti Haq. ⁹ Taiq mangai bàc hrìn, Haq thê mangai hóc tiaq padon ca Haq mòiq toq bong 'yoh, òòiq wì ùh jah hnen padit Haq. ¹⁰ Taiq Chuaq Jêxu khoi broq brêh ca bàc ngai, 'màng aih mangai leq ma i hinìç ùh hróc, ji pachiu dahnen trùh haten waç ca jah bèç chac Haq. ¹¹ Wì mangai i kiac mùt ta chac, jò hnoq Haq, wì bla-op enh ngìa ca Haq,

cachech bàu dèh doi: “Ìh Con Calô Boc Plình.” ¹² Mahaq Chuaq Jêxu gràm padràng ùh thê wì haq pa'noh ca wì 'noi q loq ca Haq.

Chuaq Jêxu Ràih Mòi q Jàt Baiq Ngai

(Mat 10:1-4; Luc 6:12-16)

¹³ Atiq ca aih Haq tǒc ta wang, creó ca 'bài mangai Haq khoi ràih. 'Bài mangai aih thia trùh haten ti Haq. ¹⁴ Haq ràih 12 ngai, creó wì: Mangai sùq đò. Haq thê wì ǒi ti Haq ðòi q wì loh lam anoi Bàu Lem. ¹⁵ Haq am ca wì cwiàng itai ðòi q drùh đac can kiac. ¹⁶ Cô hiniq wì 12 ngai Haq khoi ràih: Simôn, Haq hiniq hlài Pêtrô. ¹⁷ Jacò wa Jon con Xê-bê-đê, Haq hiniq hlài 'Bô-a-net, aih con calô da plình cađah. ¹⁸ Anrê, Philip, 'Ba-thê-lê-mi, Mathêu, Thôma, Jacò con Aphê, Thadê, Simôn mangai Ca-na-an. ¹⁹ Juda Ich-ca-ri-ôt, mangai blòq Chuaq.

Tôi q Đùng Trùh Yiang Hadròih

(Mat 12:22-32; Luc 11:14-23)

²⁰ Chuaq Jêxu wa mangai hǒc tiaq mùt ta hnem. I 'bài mangai jàn tagop ta aih bàc hrìn, 'màng aih Chuaq Jêxu wa mangai hǒc tiaq Haq mech pi dòh acaq. ²¹ Mahaq wì cadraq Haq tàng biac aih. Wì chaq Haq ðòi q wèq Haq, ma jah 'màng aih i mangai 'noi q doi: “Haq khoi ranhù.”

²² I 'bài thài ranenh ǒi ta phòq Jê-ru-sa-lem loh, wì doi: “Haq khoi i kiac 'Bê-ên-xê-bun ǒi ti chac. Haq canòm ca cwiàng itai bùa kiac ðòi q hnan đac kiac.”

²³ Chuaq Jêxu creó ca wì lam trùh ti Haq, yǒc bàu aliah anoi ca wì: “'Màng leq kiac Satan ma jah hnan đac kiac Satan? ²⁴ Tàng mòi q diac to talah, diac aih ùh dràng yòng. ²⁵ Tàng mòi q hnem ep talah baiq, hnem aih hadai ùh dràng yòng. ²⁶ 'Màng aih, tàng kiac Satan to ta'blêq ca dađeh, aih haq lah dađeh loh baiq. 'Màng aih ùh jah dràng, èh raliang piang đǒng ðìq. ²⁷ Ùh i ca cabô ma jah

mùt àtùng hang ta hnem mangai dêh padren, tàng ùh jah cật ðoìq cla haq adroi, khoi ca aih men jah yỏc da haq cùng hang. ²⁸ Joq 'nàng, Au doi ca pì: ðìq ca tôìq lôì con mangai ma broq, wa bàu capoch 'mèq ðùng Boc Plình, jah baxông. ²⁹ Mahaq mangai leq capoch 'mèq ðùng Yiang Hadròih, ùh jah baxông tôìq haq, cla haq phai pòq hloi hloi.”

³⁰ Chuaq ma jah doi 'màng aih, taiq wì doi: “I can kiac càn òi ti chac Haq.”

Miq Wa 'Bài Oh Chuaq Jêxu

(Mat 12:46-50; Luc 8:19-21)

³¹ Miq wa oh Chuaq Jêxu lam trùh yòng enh gùng ca hnem, thê wì creo ca Chuaq Jêxu loh ti wì. ³² Bàc ngai ha'ngui dudan ca Chuaq Jêxu. I mangai doi ca Haq: “Miq wa 'bài oh ìh gòm enh gùng, wì chaq ìh.”

³³ Haq tèo wì: “Cabô miq au? Cabô oh daq au?”

³⁴ Haq gliang ngan wì ma òi dudan ca Haq rai doi: “Cô raq miq Au wa oh daq Au. ³⁵ Cabô ma broq tiaq manoh Boc Plình, aih oh daq calô Au, oh daq cadrì Au wa miq Au.”

4

Bàu aliah mangai rai adrech

(Mat 13:1-9; Luc 8:4-8)

¹ Yàng ma 'noi q hòm Chuaq Jêxu hnài wì ti 'bò diac raxìq. Taiq i mangai bàc yòng òi ti 'bò diac, Chuaq Jêxu tỏc ha'ngui ta bong hnài wì òi ta go. ² Haq yỏc bàu 'mon hnài aliah ca wì bàc trong. Haq doi: ³ “Tamàng cô: I mòìq ngai loh lam rai adrech. ⁴ Jò haq rai, i pliang taclìh ti trong lam, chìm jòh caq đống. ⁵ Pliang ma 'noi q clih ta crống hmu xèm, i toq 'biaq taneh. Bu clih, haq hon hloi taiq taneh ratang, ⁶ Jò mat mahì tỏc, haq hỏnh ca tôq, taiq riah haq ùh mùt ma jrùq. ⁷ Pliang ma 'noi q hòm clih ta nòi hila. Hila cràm hla broq ca haq cayòp, ùh loh plì. ⁸ Adrech ma

clìh ta nòi taneh jìang jah yòng càn wa loh plì, mòiq pliang loh 30, pliang 'noi q loh 60, pliang 'noi q hò m 100.”

⁹ Khoi èh Haq doi: “Cabô i don, tamàng beq.”

¹⁰ Jò Chuaq Jêxu ôi mòiq Ngai, 'bài mangai ma ôi dudan ca Haq, xam 12 ngai, mangai hỏc tiaq, bỏch bàu 'mon aih enh doi cleq? ¹¹ “Bìac halac halùai da Diac Boc Plình khoi hnhu am ca pì, mahaq ca wì mangai enh gùng, ep yỏc bàu àliah òiòiq hnài wì rìm bìac,

¹² “ Òiòiq wì ngan, mahaq ùh hnoq, tàng mahaq ùh 'nì loq.

Tàng wì 'nì loq, wì jah tawìh hlài ta Boc Plình,

òiòiq Haq jah baxỏng tôiq ca wì.”[☆]”

¹³ Khoi èh Haq doi: “Pì ùh loq tàng bàu àliah aih 'mòh? Tàng 'màng aih broq 'màng leq pì ma 'nì loq òiòiq ca bàu àliah ma 'noi q? ¹⁴ Mangai rai adrech, aih mangai rai Bàu Lem. ¹⁵ Adrech ma clìh ti trong, aih 'bài mangai khoi i Bàu Lem ôi dềh ta manoh wì haq, mahaq wì bu tamàng Bàu Lem, èh kiac Satan trùh atùng yỏc Bàu Lem ma khoi rai ta manoh wì haq. ¹⁶ Hadai 'màng aih, adrech ma taclìh ta nòi raga, aih 'bài mangai tamàng Bàu Lem, tajòì 'mòi lem bùi nhàn yỏc. ¹⁷ Mahaq Bàu Chuaq ùh plỏh riah ta manoh wì haq. Wì ùh cajap manoh, èh jỏ glàm bìac nan xa, bìac ti rùp taiq tiaq Chuaq, tajòì 'mòi wì cro cađac Bàu Lem. ¹⁸ Èh 'bài adrech ma taclìh ta nòi xèm hila, aih 'bài mangai khoi tàng Bàu Lem, ¹⁹ mahaq bìac loq lo da 'nhòng cô, bìac ham ca can padrỏng, wa bìac loq ham ma 'noi q hò m, mùt ta manoh wì haq. Taiq òiòiq ca bìac aih broq cachỏp ca Bàu Lem, 'màng aih ùh loh plì. ²⁰ Mahaq 'bài adrech clìh ta nòi taneh jìang, aih mangai tamàng Bàu Lem, chiuq nhàn yỏc, èh loh plì mòiq pliang loh 30, pliang 'noi q loh 60, pliang 'noi q loh 100.”

[☆] 4:12 4:12 Êsai 6:9,10.

²¹ Haq doi hò m ca wì: “I cabô bùh đên khoi èh yỏc thùng gùp đac, loq đòiq ta ca'nàm jùang? ùh xài ep đòiq haq ti priang 'mòh? ²² Ma jah 'màng aih ùh i biac leq hlèp ma ùh pa'noh loh, ùh i biac leq hlèp ma ùh pa'noh loh ro rang. ²³ Cabô i don, tamàng beq!”

²⁴ Haq doi hò m: “Khòh tamàng ma geo biac pì ma tàng. Boc Plình jah tống am ca pì toq pì ma khoi tống, wa tống tam yi bacc ca aih hò m. ²⁵ Ma jah 'màng aih, jah am tam ca mangai leq khoi i, mangai leq ùh i jah yỏc hlài biac haq ma khoi i.”

²⁶ Haq doi hò m: “Diac Boc Plình tìah ca mangai rai adrech ta taneh. ²⁷ Khoi èh, cla haq lam cùi. Adrech aih yòng càn dahì damang, cla haq ùh 'nì adrech aih jah plòh 'màng leq. ²⁸ Ma jah 'màng aih cla taneh broq adrech aih loh plì. Baxèm adrech aih wìa maq, èh haq xròc, hi khoi haq loh plì. ²⁹ Jò plì dùm, wì 'noh haiq gat, ma jah 'màng aih khoi trùh jò gat.”

³⁰ Haq doi hò m: “Bèn achù a Diac Boc Plình wa cacleq, loq yỏc bàu alìah leq ma paro jah? ³¹ Diac Plình aih tìah ca mòiq pliàng clong habài, jò khoi rai, haq yi 'yoh òiq đống ca adrech 'noi q ta cởng taneh, ³² mahaq jò khoi rai, haq hon, wìa long yi càn ca cachiq ma 'noi q, loh hamen h càn, trùh 'mòi chòm wìa broq pù ta aih.”

³³ Haq yỏc bacc bàu hnài alìah, mahaq tiaq dèh biac wì haq 'nì loq đeh pàng leq. ³⁴ Jò leq Haq hnài wì, xôq Haq yỏc bàu alìah hnài wì, mahaq jò ùh i ca wì, Haq pa'noh ro dèh ca mangai hỏc tiaq òiq đống.

Bahùt Ta'ne Diac Raxìq

(Mat 8:23–27; Luc 8:26–39)

³⁵ Trùh chiu hì aih, Haq doi dèh ca mangai hỏc tiaq: “Beq bèn cwa tỏc pah tau.” ³⁶ Khoi ca jàn hlài, Chuaq Jêxu ỏi ta bong, mangai hỏc tiaq Haq 'nong Haq lam. Hadai i

'bài bong 'noi q lam tiaq. ³⁷ Tajòì 'mòì i bahùt càn hlôi dêh òìq jaq, diac lai laq mùt ta bong ten bình. ³⁸ Mahaq Chuaq Jêxu òi pah cloh bong, angèn gàu Haq cùi. Mangai hõc tiaq padriù Haq, wì doi: “Thài ôi, ìh ùh crè ca bèn cachit 'mòh?”

³⁹ Haq rìu, lech ca cayeo, doi ca diac raxìq: “Hatenh beq! Àt beq!” Tajòì 'mòì plinh pi cayeo wa diac raxìq hadai pi lai laq.

⁴⁰ Hi khoi, Haq bòch wì: “Gleq pì ma crè? Manoh lùì pì ta leq?”

⁴¹ Mangai hõc tiaq yùq crè òìq jaq, doi ca dabau: “Mangai cô Cabô, cayeo wa diac raxìq òìq iu bàu Haq?”

5

Mangai òi Jê-ra-sê i Kiac òi ta Chac

(Mat 8:28-34; Luc 8:26-39)

¹ Chuaq Jêxu wa mangai hõc tiaq Haq cwa trùh 'bò pah tau, mùt gùng da mangai Jê-ra-sê. ² Loh bu khoi enh bong, tajòì 'mòì i mòìq ngai i kiac òi ta chac, loh enh cadràng hanang, thia trùh jang ngìa Chuaq Jêxu. ³ Mangai aih loq òi nòi cadràng hanang. 'Nhac ca wì cật haq xam caxi mem tagwat, xôq ùh 'blêq. ⁴ Ma jah 'màng aih khoi bàc yàng wì clang jènh haq, cật tì haq xam caxi mem tagwat, xôq haq hràt đac caxi mem tagwat, wah đac long clang, ùh cabô nui ta'blêq ca haq. ⁵ Xèq ca hì, 'ngah ca mang, haq lam liq lam làn nòi cadràng hanang, lam liq lam làn ta wang, cachech cajiah, yõc hmu chot dèh chac.

⁶ Jò hnoq Chuaq Jêxu enh hangai, haq cadàu tùh bla-op jang ngìa Chuaq Jêxu, ⁷ cachech bàu dèh doi: “Waiq Chuaq Jêxu, Con Boc Plinh ma yi ha'nhèq, au wa ìh i bìac cleq? Au xin ìh paq baxa au.” ⁸ Taiq adroi Chuaq Jêxu khoi doi: “Ô kiac dù, loh khoi mangai cô beq!”

⁹ Khoi èh Chuaq Jêxu bòch: “Hiniq gè cacleq?”

Haq tèò: “Hiniq au Lình Cràm, ma jah 'màng aih taiq nhèn bàc hrìn.” ¹⁰ Haq xìn Chuaq Jêxu ca rangoq, apaq hnan wì haq lam khoi ca gùng aih.

¹¹ Ōi ta aih i mòiq calùh chùà bàc òiq jaq 'nang angoq caq ta go wang. ¹² 'Bàì can kiac xìn Chuaq Jêxu: “Am nhèn trùh ti calùh chùà tau, òòiq nhèn mùt ta wì haq.” ¹³ Chuaq Jêxu thê 'màng aih. Òiq ca can kiac loh enh chac mangai aih, mùt ti chac 'bài chùà. Calùh chùà i 2.000 toq cadàu tarǒng ta criang, hadrùc cachit ca glàc ta diac raxìq.

¹⁴ 'Bàì mangai ban chùà cadàu mot, hi khoi anoi hlài bìac aih jàp ta phòq aih wa plài dudan ca gùng aih. Mangai jàn loh ngan bìac aih. ¹⁵ Wì trùh ti Chuaq Jêxu, hnoq mangai ma adroi òiq i kiac ōi ta chac, khoi ha'ngui caxùnh cwàn eo, wa manoh ngoc haq khoi brêh. Wì crè òiq jaq. ¹⁶ 'Bàì mangai ma khoi hnoq bìac aih, anoi hlài bìac ma trùh ti mangai kiac ma rùp nèh, wa ta calùh chùà. ¹⁷ 'Bàì mangai jàn xìn Chuaq Jêxu loh khoi ca gùng wì haq.

¹⁸ Jò Chuaq Jêxu bu tǒc ta bong, mangai ma can kiac khoi mùt nèh, xìn ōi ta Chuaq Jêxu. ¹⁹ Mahaq Chuaq Jêxu ùh am. Chuaq doi: “Au thê ìh hlài ta hnem, ta nòì bua ìh, anoi hlài ca wì loq bìac càn caiq Chuaq khoi am ca ìh. Haq khoi xa-ǒch ca ìh 'màng leq.” ²⁰ 'Màng aih, haq lam jàp ta gùng Mòiq Jàt Phòq, anoi hlài bìac càn caiq Chuaq Jêxu ma khoi broq ca haq. Mangai leq tàng hadai hamaih ta manoh.

Con Cadri Jairu wa Gu Cadri Ùh Hrǒc

(Mat 9:18-26; Luc 8:40-56)

²¹ Jò Chuaq Jêxu tǒc ta bong cwa 'bò pah tau, i mangai jàn bàc tagop gòm Haq ti 'bò diac raxìq. ²² I mòiq ngai, mangai wèq hnem tagop, hiniq haq Jairu, bu hnoq Chuaq Jêxu, haq hacùn cràng jang jènh Chuaq Jêxu. ²³ Haq xìn

rangoq: “Thài ôi, con cadrì 'yoh au ùh hróc ten cachìt. Xìn Chuaq trùh òi q tì ti chac haq, haq jah rìh.” ²⁴ Chuaq Jêxu lam ti haq.

'Bàì mangai jàn hadai lam tiaq dahnen Chuaq. ²⁵ Ta aih, i mòiq ngai gu cadrì, i can ùh hróc loh mahem khoi 12 hanam. ²⁶ Dùnh dàng aih, haq chiuq nan xa am ca bàc ngai 'bacsi sì broq brêh. Haq 'noh dèh òi q ca 'bac ma xôq ùh hnoq i brêh cleq, mahaq can ùh hróc rai èh rai hlàm tam hòm. ²⁷ Jò haq hia biac Chuaq Jêxu, haq chua ta'ne wì, enh rù ca Chuaq Jêxu òi q bèq eo Chuaq Jêxu. ²⁸ Ma jah 'màng aih haq hèm dèh: “Tàng au toq jah bèq eo Chuaq, au jah brêh.” ²⁹ Adrình ca jò aih, mahem ma loh enh chac haq pi loh, haq mòn dađeh khoi jah brêh.

³⁰ Tajòì 'mòì Chuaq Jêxu mòn dèh ang ai Haq khoi loh enh chac. Haq hwi ngan wì, rai bòch: “Cabô ma khoi bèq eo Au?”

³¹ Mangai hóc tiaq doi: “Thài ôi! ìh hnoq mangai bàc hnen ìh, gleq ìh ma bòch: ‘Cabô bèq Au?’”

³² Haq ngan wì òi dudan ca Haq, òi q ngan mangai leq ma khoi broq biac aih. ³³ Mangai gu cadrì ma i can ùh hróc loq biac aih khoi trùh ca dađeh. Haq crè tarìt pacro dađeh hacùn cràng jang jènh Chuaq Jêxu anoi òng biac haq khoi broq. ³⁴ Chuaq Jêxu doi ca haq: “Con cadrì ôi, taiq ìh i manoh lùì canòm Au, ìh khoi brêh, phai yóc manoh catèm ma lam beq. ìh pi hìaq ùh hróc hòm.”

³⁵ Jò Haq òi anoi, i mangai trùh enh hnem mangai ma wèq hnem tagop doi ca haq: “Con cadrì ìh khoi cachìt, pi thê pangài broq cleq ca Thài hòm.”

³⁶ Mahaq Chuaq Jêxu ùh hèm trùh bàu aih. Haq doi ca mangai ma wèq hnem tagop: “Apaq yùq, ìh toq lùì raq.”

³⁷ Haq ùh am wì 'noi q tiaq Haq enh gùng ca Pêtrô, Jacò wa Jon oh Jacò. ³⁸ Jò wì haq trùh ta hnem mangai ma wèq hnem tagop, Chuaq Jêxu hnoq wì broq ta-ùang, tang ngai

hmoi, tang ngai cachech bàu dêh. ³⁹ Mùt ta hnem, Haq doi: “Gleq pì ma tagràng 'màng cô? Mangai 'yoh cô ùh i cachit, haq toq cùi hêq!” ⁴⁰ Wì halê Chuaq Jêxu.

Mahaq Chuaq Jêxu hnan dìq dồng ca wì loh enh gùng. Haq òiđiq toq miq baq da con 'yoh aih wa 'bài mangai ma tiaq Haq, mùt jang nòi con 'yoh 'nang cùi prôih. ⁴¹ Haq cadop ti mangai 'yoh rai doi: “Ta-li-tha Cumi,” aih: “Ô con 'yoh cadrì, Au thê oh yòng beq!” ⁴² Tajòì 'mòì con cadrì aih yòng cadiang lam, ma jah 'màng aih haq khoi jah 12 hanam. Wì òiđiq jaq hamàih ta manoh. ⁴³ Haq ùh am wì doi ca mangai 'noiđ loq biac aih. Khoi èh Haq thê am ca con 'yoh aih dahwèq caq.

6

Chuaq Jêxu Hlài ta Phôq Na-xa-ret (Mat 13:53-58; Luc 4:16-30)

¹ Chuaq Jêxu loh enh aih, Haq hlài dèh ta gùng, i 'bài mangai hóc tiaq Haq lam tiaq. ² Trùh hì Sabat, Haq mùt hnài ta hnem tagop. Mangai jàn bacc tamàng Haq.

Wì hamàih bòch dabau: “Mangai cô yóc cwàng enh leq ma jah hnài 'màng cô? Gleq Haq ma rabiaq hrìn, wa gleq Haq broq jah biac halac? ³ Enh nèh i joq Haq Mangai broq thòq long, Con Mari, daq Jacò, Jòsep, Juda wa Simôn ùh? Ma ùh xài 'bài oh cadrì Haq ma 'nang òi ti bèn 'mòh?” Taiq 'màng aih 'bài mangai ta aih loh nòih ca Haq.

⁴ Mahaq Chuaq Jêxu doi ca wì: “Mangai capoch thai Boc Plinh jah rìm nòi 'noiđ padèch haq, mahaq òi ti gùng cla, hnem cla, oh daq cla, wì lê haq.” ⁵ Òi ta aih Haq ùh jah broq biac halac, enh gùng ca Haq òiđiq tì broq brêh ca toq 'biaq ngai mangai ùh hróc. ⁶ Chuaq hamàih, ma jah 'màng aih hnoq manoh wì ùh lùì.

Chuaq Jêxu Thê Mòiq Jàt Baiq Ngai Sùq Đô Lam Hnài
(*Mat 10:5-15; Luc 9:1-6*)

Hi khoi Chuaq Jêxu lam hnài wì rìm plài haten ta gùng aih. ⁷ Haq thê 12 ngai, mangai hõc tiaq trùh ti Haq, èh thê wì lam baiq ngai, baiq ngai, am ca wì cwiàng itai drùh đac can kiac.

⁸ Haq doi dèh ca wì jò lam trong ùh thê wê cleq, enh gùng ca mòiq toq long canhra, ùh thê wê dahwèq caq, 'bao, loq 'bac ta caxi ca'nam. ⁹ Toq tõi yep, apaq caxùnh baiq blah eo. ¹⁰ Haq doi ca wì: “Jò pì mùt hnem leq, òi hloi ti hnem aih trùh hì pì loh khoi enh nòi aih. ¹¹ Tàng nòi leq ùh đìh yõc pì, hnem leq ùh pachùh pì mùt, hadai ùh tamàng bàu pì, pì lam khoi nòi aih, hapùih blo ma top ta jènh pì, aih broq teo tajraq hlài ca wì.”

¹² 'Màng aih, wì mangai hõc tiaq loh lam anoi hnài Bàu Lem ca wì òòiq wì cađac dèh manoh broq tõi. ¹³ Wì hnan đac bacc can kiac, xùt dàu ca bacc ngai ùh hrõc, wa broq brèh ca wì haq.

Jon 'Baptit 'Bìq Jêh Cađac
(*Mat 14:1-12; Luc 9:7-9*)

¹⁴ Bùa Hêrôt tàng bacc ngai anoi hlài biac Chuaq Jêxu wa 'bang tiàng da Haq, 'nah ngai doi: “Jon, mangai broq 'baptem, khoi rìh hlài enh mangai cachit, ma broq jah bacc biac halac 'màng aih.”

¹⁵ I wì ma 'noi q doi: “Haq aih Êli.”

Ma 'noi q hòm doi: “Aih mangai capoch thai Boc Plình, tiàng ca mangai capoch thai Boc Plình calah nèh.”

¹⁶ Mahaq bùa Hêrôt tàng biac aih, haq doi: “Aih Jon au ma khoi põt gàu, haq khoi rìh hlài.”

¹⁷ Taiq adroi nèh, bùa Hêrôt thê rùp cật Jon clêh hnem tù, taiq biac Hê-rô-đĩa mai Philip oh bùa, ma jah 'màng aih bùa khoi yõc haq broq mai. ¹⁸ Taiq Jon khoi doi ca bùa:

“Tiaq ranenh, ìh ùh khòh yỏc dềh mai oh.” ¹⁹ Taiq bìac aih Hê-rô-đia nòih ca Jon, enh jêh haq cachit, mahaq haq ùh jah jêh haq, ²⁰ taiq bùa Hêrôt crè ca Jon, loq ca haq mangai rìh ta-atoq wa hadròih, chaq nen wèq haq. Bùa loq enh tamàng bàu Jon, mahaq jò tàng, haq dradrèo ta manoh.

²¹ Mahaq ta'nàih ca hì caq hiniang manè hì xa-ông ca bùa Hêrôt, bùa broq hiniang akhen ca 'bài cwan càn, 'bài cwan wèq linh, wa 'bài gu craq ta gùng Ga-li-lê. ²² I con cadrì Hê-rô-đia mùt nhaiq muaq, lem manoh ca Hêrôt wa 'bài mangai ma caq hiniang ta aih.

Bùa doi ca mangai cadrì adrùh aih: “Bìac cleq ìh ma enh, xìn au beq, au am ca ìh.” ²³ Bùa pachac ca haq: “Ùh kè ìh xìn bìac cleq, au xôq am, 'nhac ca ìh xìn mòi q apah taneh Diac au, xôq au am.”

²⁴ Gu cadrì aih loh enh aih, doi dềh ca miq: “Au khòh xìn bìac cleq?”

Miq haq doi: “Thê haq am gàu Jon 'Baptit.”

²⁵ Haq mùt hòm ta nòi bùa, xìn bùa: “Au enh ìh òi q gàu Jon 'Baptit ta mà m am ca au.”

²⁶ Bùa mango òi q jaq, mahaq taiq haq khoi troq rùp bàu pachac enh ngìa ca 'bài mangai caq hiniang, 'màng aih haq pi wìa talùi dềh ca bàu. ²⁷ Tajòì 'mòi bùa thê linh pốt 'ràng gàu Jon. ²⁸ Mangai aih mùt pốt gàu Jon ta hnem tù, khoi èh òi q gàu haq ta mà m 'ràng am ca mangai cadrì adrùh. Mangai cadrì adrùh aih 'ràng dềh ca miq haq. ²⁹ Mangai hỏc tiaq Jon hìa bìac aih, wì trùh yỏc hanang Jon catùh.

Chuaq Broq 'Benh Loh Bằc

(Mat 14:13-21; Luc 9:10-17; Jon 6:1-14)

³⁰ 'Bài sùq đò tagop ỏi ti Chuaq Jêxu, anoi hlài ca Haq rìm bìac wì ma khoi broq wa khoi hnài. ³¹ Haq doi dềh ca mangai hỏc tiaq: “Loh lam ta nòi hawit beq, padài toq

'biaq.” Ma jah 'màng aih i bàc mangai tiaq wì haq, Chuaq Jêxu wa mangai hõc tiaq mech pi dòh acaq.

³² Hi khoi Haq wa mangai hõc tiaq enh òi crài, hi tõi ta bong lam ta nòi hawit. ³³ Mahaq bàc ngai hnoq wì haq lam. Wì khoi loq ca nòi, 'màng aih wì loh enh rìm phòq, cadàu trùh ta nòi adroi ca Chuaq Jêxu wa mangai hõc tiaq Haq. ³⁴ Chuaq Jêxu loh enh bong hnoq mangai jàn bàc. Haq xa-õch ca wì ma jah 'màng aih wì tìah ca trìu ùh i ca mangai ban. Haq hnài wì bàc trong.

³⁵ Trùh chiu, mangai hõc tiaq lam trùh ti Chuaq Jêxu, doi ca Haq: “Nòi cô hawit, mat mahì khoi ten clih. ³⁶ Xìn ìh am mangai jàn hlài, òi q wì mùt ta plài haten ta cô rõt dahwèq caq.”

³⁷ Haq doi: “Pì raq mangai am ca wì dahwèq acaq.”

Mangai hõc tiaq doi: “Nhèn ep lam rõt baiq hrinh ðe-na-ri 'bac 'benh am ca wì caq 'mòh?”

³⁸ Haq bòch: “Pì i toq leq toq 'benh? Ngan thù beq.”

Mangai hõc tiaq ngan, khoi èh doi: “Padam toq 'benh wa baiq pliang ca.”

³⁹ Haq doi ca 'bài mangai hõc tiaq thê jàn ha'ngui òi tang lù ta nhat. ⁴⁰ Wì ha'ngui tiaq tang brong, i brong 100 ngai, i brong 50 ngai. ⁴¹ Chuaq Jêxu yõc padam toq 'benh wa baiq pliang ca, ngoi ngan ta plình waiq manè Boc Plình, khoi èh goh 'benh am ca mangai hõc tiaq axong ca mangai jàn, èh hadai axong ca wì ca. ⁴² Mangai leq caq ji panàc. ⁴³ Khoi ca aih, wì tõi ch hì 'bài ha'nech 'benh wa ca òi rah, jah 12 rajo. ⁴⁴ Mangai ma caq hì aih 5.000 ngai toq gu calò.

Chuaq Jêxu Lam Jènh ti Riang Diac Raxìq

(Mat 14:22-33; Jon 6:15-21)

⁴⁵ Tajòì 'mòi Chuaq Jêxu thê wì mangai hõc tiaq Haq tõi ta bong lam pah tau, trùh ta phòq 'Bêt-sai-ða adroi ca Haq,

jò Haq ca'naih con jàn hlài. ⁴⁶Jò 'bài jàn khoi hlài, Haq tồc ta bôl wang waiq khàn.

⁴⁷ Trùh xèq, bong mangai hỏc tiaq Haq khoi ỏi ta'ne diac. Haq ỏi mòiq Ngai ta go. ⁴⁸ Haq hnoq mangai hỏc tiaq chùng bong ãi q jaq xa, ma jah 'màng aih taiq i cayeo dang lúi. Pôn jò daxroq Chuaq Jêxu lam jènh ti riang diac trùh ti mangai hỏc tiaq. Haq enh lam cwa ca wì. ⁴⁹ Mangai hỏc tiaq hnoq Haq lam ti riang diac. Wì xoh ãeh, aih kiac cachỏc. Wì cachech bàu ãeh. ⁵⁰ Ma jah 'màng aih mangai leq hnoq Haq xỏq yủq crẻ ãi q jaq.

Mahaq Haq doi ca wì: “Catẻm manoh beq! Au cỏ. Apaq crẻ!” ⁵¹ Haq cadiang tồc ta bong ti mangai hỏc tiaq. Tajỏi 'mỏi pi cayeo. Mangai hỏc tiaq hnoq bẻac aih, wì hamẻih tam hỏm. ⁵² Ma jah 'màng aih, taiq wì ùh 'nẻi loq ca bẻac halac Haq broq 'benh loh bẻac, taiq manoh wì xỏq ỏi cadoq.

Chuaq Broq Brẻh Bẻac Ngai
(Mat 14:34-36)

⁵³ Jỏ wì khoi cwa diac, trùh ti Gẻ-nẻ-sa-rẻt, wì tồc ta go. ⁵⁴ Chuaq Jêxu bu loh enh bong, bẻac ngai khoi canao loq ca Haq. ⁵⁵ Wì cadàu lam anoi hlài ca jàn rẻm nẻi. Wì tẻng 'rẻng 'bẻi mangai ùh hrỏc củi ta dradrah, hẻa Haq lam ta leq, wì 'rẻng ta aih. ⁵⁶ Haq trùh nẻi leq, phỏq leq, gủng leq, xỏq i wì 'rẻng mangai ùh hrỏc ãẻi q ta chỏq. Wì xẻn Haq am wì bẻq ãeh ha'mai eo Haq. Mangai leq jah bẻq, mangai aih jah brẻh.

7

Bẻac 'Nheo Tẻ
(Mat 15:1-9)

¹ I mangai Pha-ri-sẻi wa thẻi ranenh loh enh Jẻ-ru-sẻlem, tagop ti Chuaq Jêxu. ² Wì hnoq i mangai hỏc tiaq Chuaq Jêxu ùh 'nheo tẻ adroi ca caq pua. ³ Ma jah 'màng

aih, mangai Pha-ri-si wa mangai Yothaiq ùh jah acaq tàng ùh 'nheo tì broq bìac tiaq craq enh calah nèh. ⁴ Jò wì hlài enh chòq, tàng wì ùh lùac phep tì ta diac tiaq ranenh lè, ji ùh jah acaq. Wì haq òi wèq bàc ranenh lè ma 'noi q hò m, troi haliang doi chrõng, haliang abòq xam taneh, wa abòq xam dùng.

⁵ Màng aih 'bài mangai Pha-ri-si wa 'bài thài ranenh bòch Haq: “Gleq mangai hõc tiaq ìh ùh broq tiaq bàu craq enh calah nèh, ùh 'nheo tì adroi ca acaq 'màng 'mat?”

⁶ Haq padreo bàu doi: “Ô mangai bàu lem manoh dù, Êsai khoi doi adroi bìac pì òi q jaq troq, tìah ca khoi achìh: “‘Jàn cô loq iu Au toq xam bàu capoch, mahaq manoh wì haq hangai ca Au.

⁷ Bìac wì haq cùh waiq Au, aih 'ngwan, ma jah 'màng aih wì haq hnài ranenh tiaq bàu con mangai capoch.’[☆]

⁸ Pì khoi cađac bàu thê Boc Plình, mahaq wèq bìac broq tiaq mangai enh calah nèh.”

⁹ Chuaq Jêxu doi hò m ca wì: “Pì i manoh tawe ch òi q jaq cađac bàu thê Boc Plình, òi q wèq bìac broq tiaq pì enh calah nèh. ¹⁰ Ma jah 'màng aih Môise khoi doi: ‘Thê pì loq iu dèh ca miq baq,’[☆] èh haq doi tam, ‘mangai leq waiq hanip dèh miq baq phai cachìt.’[☆] ¹¹ Mahaq pì doi: ‘Tàng cabô doi dèh ca miq baq: “Rì m bìac au ma i òi q ban miq baq, aih cre o Coban, aih i hiniq, au khoi am ca Boc Plình.”’

¹² Màng aih, pì doi mangai aih pi khòh jùp dèh miq baq bìac leq hò m. ¹³ Taiq pì khoi broq bìac tiaq pì enh calah nèh, 'màng aih pì broq bàu Boc Plình loh ca ùh i ca lòi q cleq. Pì òi hnài bàc bìac ma 'noi q hò m tìah ca bìac aih òi q.”

[☆] 7:7 7:7 Êsai 29:13.

[☆] 7:10 7:10 LEA 20:12; RAH 5:16.

[☆] 7:10 7:10

LEA 21:17; Lêwi 20:9.

¹⁴ Chuaq Jêxu creò òiq ca mangai jàn trùh. Haq doi ca wì: “Au thê òiq ca pì tamàng Au doi òòiq 'nì loq. ¹⁵ Ùh i bìac cleq òi enh gùng ma jah mùt broq amùà ta chac, mahaq bìac leq loh enh chac pì, bìac aih ma broq pì amùà. ¹⁶ Tàng mangai leq i don òòiq tàng, tamàng beq.”

¹⁷ Jò khoi hangai ca 'bài mangai bàc, Haq mùt ta hnem. Mangai hõc tiaq bòch hlài Haq bàu Haq ma capoch aliah aih. ¹⁸ Haq doi: “Pì ma ùh i ca manoh hèm 'mòh? Pì ma 'nhòq 'nì ùh i ca dahwèq caq leq enh gùng jah mùt broq con mangai ùh hadròih, ¹⁹ taiq dahwèq caq ùh mùt ta manoh mangai, mahaq mùt ta cliac, khoi èh 'noh đac. 'Màng aih Chuaq doi: Òiq òõng ca dahwèq caq, òiq lem hreo.”

²⁰ Haq doi hòm: “Bìac cleq ma loh enh manoh mangai, aih bìac broq mangai loh ùh hadròih. ²¹ Ma jah 'màng aih, joq 'nàng enh manoh mangai loh bìac hèm 'mèq, tango anang, atùng, jêh mangai, ²² ham ca enh tango, ham ca cùng hang wì, ngang dù, loq amòng, manhài trái, tagìq tagìa, capoch jù lê, loq catèh, capoch bàu blùng. ²³ Òiq ca bìac aih loh enh manoh broq ca con mangai ùh hadròih.”

Mangai Gu Cadrì Ca-na-an
(Mat 15:21-28)

²⁴ Khoi ca aih Haq lam trùh ta phòq Tirò wa Sidôn. Haq mùt ta hnem ùh enh cabô loq, mahaq ùh jah cadoc. ²⁵ Mòiq ngai gu cadrì ma hìa tàng Chuaq Jêxu òi ta aih, i con cadrì 'yoh ma can kiac khoi mùt. Haq trùh pacro òàđeh jang jèh Chuaq Jêxu. ²⁶ Gu cadrì aih mangai Hilap, jàn Sirô Phê-ni-xi. Haq xìn Chuaq Jêxu hnan đac can kiac loh khoi enh chac con haq.

²⁷ Chuaq Jêxu doi ca haq: “Khòh òòiq ca con caiq caq panàc hòiq, taiq ùh troq yõc dahwèq caq con caiq tèm am ca coq con.”

²⁸ Mahaq gu cadrì aih tèo: “Waiq Chuaq, hi loq ca 'màng aih, mahaq coq con òi ta ca'nàm ca'bông caq 'benh con caiq ma ha'monh.”

²⁹ Chuaq Jêxu doi: “Lam beq. Taiq bàu aih, kiac khoi loh enh chac con cadrì ìh.”

³⁰ Jò haq hlài ta hnem, hnoq dèh con ca'nùng ta jùang. Kiac khoi loh enh chac haq.

Mangai Clich wa Capoch Rađa

³¹ Chuaq Jêxu loh enh phôq Tirò cwa phôq Sidôn trùh Mòiq Jàt Phôq ta gùng diac raxìq Ga-li-lê. ³² Wì 'ràng ca Haq mangai clich wa capoch rađa, xìn Haq broq brêh ca mangai aih.

³³ Haq 'nong mangai aih lam hangai ca mangai bàc, khoi èh òòiq hadrang tì jang don haq, cachôh diac hai xùt jang rapet mangai aih. ³⁴ Khoi èh, Haq ngoi ngan ta plình, hihèm jrùq, hi doi ca mangai aih: “Ep-pha-ta!” Aih i hiniq: “Tapèh beq!” ³⁵ Tajòì 'mòi don haq jah tàng, rapet haq rađah, haq capoch hloh ro rang.

³⁶ Hi khoi Chuaq Jêxu ùh am wì anoi hlài biac aih ca mangai 'noi, mahaq kiang Haq padràng, kiang wì anoi. ³⁷ Dìq ca wì ma tàng biac aih hamàih ta manoh doi: “Rìm biac Haq khoi broq lem lình òiq jaq, broq mangai clich jah tàng, mangai lâu jah capoch.”

8

Yàng Baiq Chuaq Broq 'Benh Loh Bàc

(Mat 15:32-39)

¹ Ta 'bài hì aih, i jàn bàc hòm lam tiaq Chuaq Jêxu; wì ùh i ca dahwèq caq. Haq creò dèh ca mangai hỏc tiaq haq doi: ² “Au xa-ỏch ca mangai jàn cô ma jah 'màng aih khoi piq hì cô wì tiaq Au, ùh i cleq caq. ³ Tàng Au thê wì hlài

cliac dech trùh dèh ta gùng wì haq, wì cro ti trong, ma jah 'màng aih i 'bài mangai trùh enh gùng hangai.”

⁴ 'Bài mangai hóc tiaq bòch Haq: “Ōi ta ðùng hawit cô, nhèn ùh 'nì chaq 'benh ta leq ðòiq am ca wì.”

⁵ Haq bòch: “Pì i 'benh bàc 'biaq?”

Wì doi: “I tapèh toq.”

⁶ Haq thê mangai jàn ha'ngui ta taneh. Khoi ca aih, yóc tapèh toq 'benh, manè Boc Plình, hi khoi goh 'benh am ca mangai hóc tiaq axong. Mangai hóc tiaq axong ca mangai jàn. ⁷ Mangai hóc tiaq ji i toq 'biaq pliang ca 'yoh. Chuaq Jêxu manè pôi Boc Plình, khoi èh thê axong ca wì troi ma axong 'benh. ⁸ Mangai leq caq xôq panàc tàu tà. Wì tóch hlài 'bài ha'nech ma ði rah jah tapèh rajo. ⁹ 'Bài mangai caq hì aih ùac aiq 4.000 ngai. Hi khoi Chuaq Jêxu thê wì hlài. ¹⁰ Tajòì 'mòi Haq tồc ta bong dèh ti 'bài mangai hóc tiaq, lam gùng Đa-ma-nu-tha.

Blo Da Mangai Pha-ri-si

(Mat 16:1-4)

¹¹ I 'bài mangai Pha-ri-si, trùh ta aih, chaq trong rahen ca Haq, thê Haq broq bìac halac enh plình ðòiq thù Haq.

¹² Chuaq Jêxu xanh ta manoh, doi: “Gleq xinoi cô xìn ngan bìac halac? Joq 'nàng, Au doi ca pì, ùh jah am ca pì hnoq bìac halac leq.” ¹³ Khoi èh Haq loh enh wì, tồc ta bong cwa pah tau.

¹⁴ 'Bài mangai hóc tiaq hèt wê 'benh. Ta bong i mòiq toq 'benh raq. ¹⁵ Haq pariaq ca mangai hóc tiaq: “Ep ngan kenh blo da mangai Pha-ri-si wa blo da 'bài bùa Hêrôt.”

¹⁶ Mangai hóc tiaq anoi ca dabau: “Aih taiq bèn ùh i wê 'benh.”

¹⁷ Mahaq Chuaq Jêxu khoi loq bìac aih, Haq doi: “Gleq pì ma doi ca dabau aih taiq pì ùh i ca 'benh? Pì ma 'nhòq tàng, ma 'nhòq 'nì? Gleq manoh pì ma cadoq yôt? ¹⁸ Pì i

mat, gleq pì ma ùh hnoq? I don, gleq pì ùh tàng? Pì ùh hmàng 'mòh? ¹⁹ Jò Au goh padam toq 'benh am ca 5.000 mangai caq, pì ti tóch 'benh ha'nech jah toq leq rajo?"

Wì doi: "Mòiq jàt baiq rajo."

²⁰ "Èh jò Au goh tapèh toq 'benh am ca 4.000 ngai, pì tóch hlài jah toq leq rajo 'benh ha'nech?"

Wì doi: "Tapèh rajo."

²¹ Haq doi: "Pì 'nhòq 'nì loq 'mòh?"

Mangai Ùh Xao Õi 'Bêt-sai-đa

²² Atìq ca aih, Chuaq Jêxu wa mangai hóc tiaq lam trùh phôq 'Bêt-sai-đa. Wì 'ràng ca Haq mòiq ngai, mangai ùh xao xìn Haq broq brêh ca mangai aih. ²³ Haq rùp tì mangai aih, 'nong loh enh gùng ca phôq, cachôh diac hai xùt ta mat haq, bèq chac haq rai bòch: "Hnoq cleq ùh?"

²⁴ Mangai ùh xao ngoi ngan rai doi: "Au hnoq mangai, mahaq wì tiàh ca long cadiang lam."

²⁵ Khoi èh, Chuaq Jêxu òiq tì ti mat haq. Haq ngan hnoq, jah 'ngah mat, hnoq ro rang òiq òng. ²⁶ Chuaq Jêxu thê haq hlài ta hnem, wa tanap ca haq: "Apaq mùt ta phôq."

Pêtrô Doi Chuaq Jêxu, Haq Crich

(Mat 16:13-20; Luc 9:18-21)

²⁷ Chuaq Jêxu wa mangai hóc tiaq Haq lam khoi ca nòi aih, trùh ta 'bài plài haten ca gùng Sê-sa-rê Philip. Jò lam ti trong, Haq bòch dèh mangai hóc tiaq: "Wì doi Au cabô?"

²⁸ Wì tèò: "Tang ngai doi, Jon 'Baptit. Tang ngai doi, Êli. Tang ngai ma 'noi q doi, mòiq ngai capoch thai Boc Plình enh calah nèh."

²⁹ Haq bòch: "Pì doi Au cabô?"

Pêtrô tèò: "Ìh Crich."

³⁰ Chuaq Jêxu ùh am dèh mangai hóc tiaq anoi biac Haq ca mangai 'noi q loq.

Chuaq Doi Adroi, Bìac Cachit Wa Rih Hlài da Haq

(Mat 16:21-28; Luc 9:22-27)

³¹ Khoi èh, Haq hnài dèh 'bài mangai hóc tiaq: “Con Mangai phai chiuq nan xa bàc, phai 'bìq 'bài craq broq gàu phôq, 'bài pajàu ha'nhèq wa 'bài thài ranenh 'noh đac, wa phai chiuq cachit. Atìq ca piq hì jah rih hlài.” ³² Chuaq Jêxu khoi patô bìac aih ro rang dèh ca mangai hóc tiaq. Taiq 'màng aih Pêtrô adràc Chuaq Jêxu lam yi hangai ca mangai hóc tiaq ma 'noi, hi khoi haq yóc bàu pariaq tât Chuaq Jêxu.

³³ Mahaq Chuaq Jêxu wih ngan mangai hóc tiaq, lech ca Pêtrô: “Ô kiac Satan, lùì òi enh rù ca Au beq! Ma jah 'màng aih ìh ùh hèm trùh bìac Boc Plinh, mahaq ìh hèm toq bìac con mangai.”

³⁴ Khoi èh haq creo ca mangai jàn wa mangai hóc tiaq, Haq doi: “Tàng mangai leq enh tiaq Au, phai cađac dađeh, xùì dèh long pagat lam tiaq Au. ³⁵ Ma jah 'màng aih mangai leq enh dèch dèh can rih, jah hnhung. Èh mangai leq cađac dèh can rih taiq tiaq Au wa tiaq Bàu Lem, mangai aih jah dèch. ³⁶ Mangai leq tàng jah đìq ca crông taneh cô, mahaq cađac hnhung dèh mahua yiang, i ca lòi, cleq ùh? ³⁷ Yóc cacleq ma rôt hlài dèh mahua yiang? ³⁸ Ma jah 'màng aih òi ta'ne xinoi tango anang broq tòi, cô, tàng mangai leq camaih ca Au wa Bàu Lem Au, èh Con Mangai hadai cađac mangai aih, jò Haq òi ti can 'ngah 'ngiang Baq Haq lam trùh ti 'bài 'bình plinh hadròih.”

9

Bìac Chuaq Halih 'Mù

(Mat 17:1-13; Luc 9:28-36)

¹ Haq doi hòm ca mangai hóc tiaq: “Jòq 'nàng Au doi ca pì, pì ma yòng jang cô, xôq i 'nah ngai ùh cachit adroi ca wì 'nhòq hnoq Diac Boc Plinh yóc cwiàng itai lam trùh.”

² Tadràu hì atìq, Chuaq Jêxu 'ràng Pêtrô, Jacò, wa Jon tồc ta bôì wang ha'nhèq. Haq loh 'mù ca-ah enh ngìa ca wì piq ngai. ³ Eo Haq loh ca 'ngah taboc camla òiq ca jaq, òi crông taneh ùh i ca mangai leq broq nui taboc 'màng aih. ⁴ Êli wa Môise, loh capoch tùang ca Chuaq Jêxu.

⁵ Pêtrô doi ca Chuaq Jêxu: “Thài ôi, bèn òi ta cô lem òiq jaq. Nhèn broq piq toq ranòh, mòiq toq ca Ìh, mòiq toq ca Môise, mòiq toq ca Êli.” ⁶ Pêtrô doi daiq 'màng aih, taiq haq ùh 'nì capoch cleq, taiq wì haq yùq òiq jaq.

⁷ Khoi èh i mòiq hatò yùc trùh glom wì haq. I bàu capoch enh yùc doi: “Mangai cô Con Calô Au, Au loq waq ca Haq, pì tamàng tiaq bàu Haq beq.”

⁸ Ta'ngàc jò aih, 'bài mangai hỏc tiaq ngan dudan, pi hnoq cabô hòm, hnoq toq Chuaq Jêxu yòng mòiq Ngai raq.

⁹ Jò wì loh enh bôì wang, Haq ùh am dèh mangai hỏc tiaq anoi hlài ca wì 'noi q loq biac wì haq khoi hnoq, trùh hì Haq jah rìh hlài enh nòi cachìt. ¹⁰ 'Bài mangai hỏc tiaq hmàng bàu aih. Wì bòch dabau: “Mangai cachìt rìh hlài aih 'màng leq.”

¹¹ Wì bòch hòm Haq: “Gleq 'bài thài ranenh doi, Êli ep trùh adroi?”

¹² Haq padreo bàu doi: “Joq 'nàng Êli ep trùh adroi ha'naoq hlài rìm biac. Tàng 'màng aih gleq ma jah i achìh biac Con Mangai: Haq ep chiuq nan xa, chiuq wì lê Haq?”

¹³ Manàiq cô, Au doi ca pì: Êli khoi trùh. Wì ùh òiq yỏc haq ti manoh wì, tìah ca bàu Sech Hadròih khoi achìh hlài biac mangai aih.”

Mangai i Kiac Òi ta Chac

(Mat 17:14-21; Luc 9:37-43)

¹⁴ Chuaq Jêxu wa piq ngai, mangai hỏc tiaq aih lam trùh ti 'bài mangai hỏc tiaq tau, hnoq 'bài mangai jàn bàc òi dudan, hadai i 'bài thài ranenh 'nang tarahen ca 'bài

mangai hóc tiaq aih. ¹⁵ Bu hnoq Chuaq Jêxu, òi q òng ca 'bài mangai jàn hamàih, lam òh yóc Haq.

¹⁶ Haq bòch wì: “Pì tarahen ca 'bài mangai hóc tiaq bìac cleq?”

¹⁷ I mòiq ngai ta 'bài mangai bàc, bòch: “Thài òi, au khoi 'ràng òh con calô au trùh ca ìh, i kiac làu òi ta chac haq. ¹⁸ Jò leq can kiac mùt ta haq, rapàt haq ti taneh, broq haq loh camùh ti hacùng, cadrit hanenh, khoi èh loh ca gang. Au khoi xìn mangai hóc tiaq ìh hnan ðac kiac aih, mahaq wì hnan ùh jah.”

¹⁹ Chuaq Jêxu òi: “Ô xinòi ùh i ca manoh lùì, Au òi ti pì trùh jò leq cô èh? Au chiùq àt ca pì trùh jò leq cô èh? 'Ràng con ìh trùh ti Au beq.”

²⁰ Wì 'ràng con mangai aih trùh jang Chuaq. Bu hnoq Chuaq, tajòi 'mòi haq rapàt con 'yoh aih tacro ta taneh, hatrêh palenh ta taneh loh camùh ti hacùng.

²¹ Chuaq Jêxu bòch baq haq: “Haq loh ca 'màng cô ònh neo?”

Baq haq òi: “Enh jò haq òi 'yoh. ²² Khoi bàc yàng kiac hwenh haq cìh ta ùnh, ta ðiac, òòiq jêh ðac haq, mahaq tàng ìh broq jah, xìn ìh xa-öch wa jùp òò nhèn.”

²³ Chuaq Jêxu òi: “Gleq ìh ma òi: Tàng ìh broq jah? Mangai leq lùì, jah òi q rìm bìac haq ma enh.”

²⁴ Tajòi 'mòi baq con 'yoh aih cachech bàu òh òi: “Au lùì, xìn Chuaq jùp au i manoh jah lùì joq 'nàng.”

²⁵ Jò Chuaq Jêxu hnoq mangai jàn bàc pa-apùnh cadàu trùh, Haq lech ca can kiac rai òi: “Gè kiac ma broq ca con mangai cô làu, cìch òn, Au òh gè loh khoi enh mangai cô beq, apaq mùt ta haq hòh!”

²⁶ Can kiac cachech bàu òh. Haq rapàt con mangai aih, khoi èh haq loh. Mangai 'yoh aih pi tadroq, òi ca khoi cachit. Wì mangai bàc òi: “Haq khoi cachit.” ²⁷ Mahaq Chuaq Jêxu rùp òi òh haq, hi khoi haq yòng.

²⁸ Jò Chuaq Jêxu mùt ta hnem, 'bài mangai hõc tiaq bòch hlèp Haq: “Gleq nhèn hnan kiac aih ùh jah?”

²⁹ Haq doi: “Tàng ùh waiq khàn, ùh i cabô jah hnan 'noh đac kiac 'màng aih.”

Chuaq Doi Adroi, Bìac Cachit Wa Rìh Hlài da Haq

(Mat 17:22-23; Luc 9:43-45)

³⁰ Enh nòi aih Chuaq Jêxu wa mangai hõc tiaq Haq lam cwa gùng Ga-li-lê. Haq ùh enh am ca mangai 'noi q loq.

³¹ Ma jah 'màng aih Haq enh hnài dèh toq 'bài mangai hõc tiaq raq hêq. Haq doi ca wì: “Mòiq hì cô èh, Con Mangai ep chiùq wì rùp mùt ta tì mangai dù. Wì aih jêh đac Haq cachit, mahaq khoi piq hì Haq rìh hlài.” ³² Mahaq 'bài mangai hõc tiaq ùh 'nì tàng bàu aih. Wì crè, ùh hùà bòch Haq.

Cabô Yi Càn ta Diac Plình

(Mat 18:1-5; Luc 9:46-48)

³³ Jò wì lam trùh ta phòq Ca-bê-na-um, wì 'nang òi ta hnem, Haq bòch 'bài mangai hõc tiaq: “Jò lam ti trong pì tarahen ca dabau bìac cleq?” ³⁴ Dìq ca mangai hõc tiaq òi hatenh, ma jah 'màng aih jò òi ti trong, wì tarahen ca dabau, cabô ma broq yi càn òi ta bèn.

³⁵ Haq ha'ngui, creò đeh ca 12 ngai, mangai hõc tiaq, Haq doi: “Tàng mangai leq enh 'broq gàu, haq phai paha'neq dadeh wa patih ca rìm ngai.”

³⁶ Khoi èh, Haq ca'mình mòiq ngai mangai 'yoh, yòng òi ta'ne 'bài mangai hõc tiaq, Haq doi: ³⁷ “Cabô ma leq taiq haq canòm hiniq Au, đìh yõc mòiq con 'yoh 'màng cô, aih tìah ca haq đìh yõc Au, wa cabô ma leq đìh yõc Au, ùh xài haq toq đìh yõc Au hêq, mahaq ji đìh yõc Haq ma khoi thê Au trùh ta cô.”

Cabô ùh Tajraq hlài,

Haq Hatroq ca Bèn
(Luc 9:49-50)

³⁸ Jon doi ca haq: “Thài ôi, nhèn khai lah hnoq, i mangai canòm ca hiniq ìh, hnan đac can kiac. Nhèn padràng haq, ma jah 'màng aih haq ùh i tiaq bèn.”

³⁹ Chuaq Jêxu doi: “Apaq tạt haq, ma jah 'màng aih, ùh i ca cabô canòm ca hiniq Au broq bìac halac, èh capoch 'mèq ca Au. ⁴⁰ Tàng mangai leq ùh tajraq hlài ca Au, aih mangai hatroq ca bèn. ⁴¹ Au doi ca pì: Mangai leq ma am ca pì ôq mòi q doi chrõng diac taiq pì tiaq Crich, joq 'nàng mangai aih ùh hnhung bìac baha ca haq.

⁴² “Tàng mangai leq baxrùq ca mòi q ngai mangai 'yoh ma khai lúi Au broq tôiq, đàng ca cật apao hmu ti ranõng haq, khai èh hwenh ca'nìh đac ta diac raxìq yi lem hòm. ⁴³⁻⁴⁴ Tàng tì ìh baxrùq ca ìh broq tôiq, thê ìh coh đac beq. Thìuq mòi q apah tì mahaq jah i can rìh halinh, lem yi hnao ca tôm baiq apah tì mahaq taclìh ta 'bau ùnh, ta nòi 'bau ùnh cheo pani baxa ùh pat. ⁴⁵⁻⁴⁶ Tàng jènh ìh baxrùq ca ìh broq tôiq, thê ìh coh cađac beq, ma jah 'màng aih ìh thìuq mòi q apah jènh mahaq jah i can rìh halinh, lem yi hnao ca tôm baiq apah jènh, mahaq clìh ta 'bau ùnh. ⁴⁷ Tàng mat ìh baxrùq ìh broq tôiq, thê ìh 'bacsì đac beq, ma jah 'màng aih ìh thìuq mòi q apah mat mahaq jah mùt ta Diac Boc Plình, lem yi hnao ca tôm baiq toq mat mahaq clìh ta 'bau ùnh tôq.

⁴⁸ “‘Aih nòi hraì ùh cachìt, ùnh ùh pat.’[☆]

⁴⁹ Ma jah 'màng aih rìm ngai phai thìuq jràu boh xam ùnh.

⁵⁰ “Boh aih lem, mahaq tàng boh pì xang, yõc cleq broq hlài òi q haq xang? Pì phai i boh ta manoh pì, wa phai rìh trah hatroq ca dabau.”

[☆] 9:48 9:48 Êsai 66:24.

10

Bìac Cađac Mai
(*Mat 19:1-12; Luc 16:18*)

¹ Chuaq Jêxu loh enh Ca-bê-na-um, trùh ta gùng Judia, pah cròng diac Jôđan. Mangai jàn bacc tagop ỏi ti Haq hòm. Haq xôq hnài wì tìaah ca yàng ma 'noi q òi q.

² 'Bài mangai Pha-ri-si thia haten, bôch òòi q bahlac Haq: “Gu calô i khòh cađac dèh mai ùh?”

³ Haq padreo bàu doi: “Sech Môise khoi thê broq 'màng leq?”

⁴ Wì doi: “Môise khoi am achìh jài q òòi q cađac mai.”

⁵ Chuaq Jêxu doi: “Aih tai q manoh pì cadoq, Môise ma khoi achìh bàu thê 'màng aih. ⁶ Mahaq enh jò calah baxèm, Boc Plình 'broq mòi q ngai gu calô wa mòi q ngai gu cadrì.”[✠] ⁷ ‘Tai q 'màng aih raq, gu calô talah dèh ca mi q baq lam rìh dèh ti mai. ⁸ Wa bai q ngai jah wìa mòi q toq chac.”[✠] Tai q 'màng aih, òng mai ùh xài bai q hòm, mahaq mòi q. ⁹ 'Màng aih, con mangai ùh khòh lah 'bài mangai leq ma Boc Plình khoi yùp broq mòi q.”

¹⁰ Jò Haq mùt ta hnem, mangai hóc tiaq bôch haq bìac aih. ¹¹ Haq doi: “Mangai leq cađac ðeh mai yóc òn mai 'noi q, mangai aih khoi broq tòi q tango. ¹² Tàng gu cadrì cađac ðeh òng, yóc òng 'noi q, mangai aih hadai broq tòi q tango.”

Chuaq Am Xôq ca 'Bài Con 'Yoh
(*Mat 19:13-15; Luc 18:15-17*)

¹³ Wì 'ràng 'bài con 'yoh trùh ti Chuaq Jêxu, xìn haq bèq wì, mahaq 'bài mangai hóc tiaq lech ca 'bài mangai ma 'ràng wì. ¹⁴ Chuaq Jêxu hnoq bìac aih, Haq ùh bùi. Haq lech ca wì mangai hóc tiaq, Haq doi: “Òòi q wì 'yoh trùh ti Au beq, apaq tât wì haq, ma jah 'màng aih Diac Boc Plình

✠ 10:6 10:6 BB 1:27. ✠ 10:8 10:8 BB 2:24.

đìh yỏc mangai leq i manoh tìah ca wì 'yoh 'mat. ¹⁵ Joq 'nàng, au doi ca pì, mangai leq ùh nhàn yỏc Diac Boc Plình tìah ca wì 'yoh, mangai aih ùh jah mùt Diac aih.” ¹⁶ Haq ca'mình wì 'yoh, khoi èh Haq bèq tì ti chac wì, waiq xỏq ramỏt ca wì.

Mangai Gu Radam Padrỏng Can
(Mat 19:16-30; Luc 18:18-30)

¹⁷ Jỏ Chuaq Jêxu padon loh lam, i mòiq ngai cadàu trùh hacùng cràng jang ngĩa Haq, rai bỏch: “Ôi Thài lem lình, au ep broq 'màng leq đòiq jah i can rìh hloi hloi?”

¹⁸ Chuaq Jêxu bỏch haq: “Gleq ìh ma doi ca Au lem lình? Ùh i cabô lem lình enh gùng ca Boc Plình. ¹⁹ ìh loq bàu thê: ‘Apaq jêh đac mangai, apaq tango, apaq atùng, apaq capoch amòng, apaq padô 'nùt, wa phai loq iu dềh miq baq.’[☆]”

²⁰ Haq tèo: “Thài ôi, enh jỏ au ỏi 'yoh trùh manàiq, au khoi tiaq đìq ca ranenh aih.”

²¹ Chuaq Jêxu ngan haq, loq waq ca haq, èh Chuaq Jêxu doi: “ìh ỏi thìuq mòiq biac. Au thê ìh tech đổng dềh cùng hang, khoi èh, am ca mangai pa beq. 'Màng aih ìh jah i cùng hang ỏi ta Diac Plình, èh lam tiaq Au.”

²² Jỏ tàng bàu aih, haq nhinh mùh mat, loh ca mango đìq jaq, hi loh lam, ma jah 'màng aih taiq haq i bacc cùng hang.

²³ Chuaq Jêxu ngan dudan. Haq doi ca mangai hỏc tiaq: “Mangai can padrỏng mùt Diac Boc Plình xa đìq jaq.”

²⁴ Mangai hỏc tiaq tàng bàu aih hamàih ta manoh. Mahaq Chuaq Jêxu doi: “Ô 'bài con, mangai leq ma canòm ca biac can padrỏng, haq mùt Diac Boc Plình xa đìq jaq. ²⁵ Lỏcđã chua cloh jrùm xùang yi hnao ca mangai can padrỏng mùt Diac Boc Plình.”

[☆] 10:19 10:19 LEA 20:12-16; RAH 5:16-20.

²⁶ Mangai hóc tiaq hamàih dìq jaq, wì bòch Haq: “Tàng 'màng aih, cabô hòm ma jah dèch?”

²⁷ Chuaq Jêxu ngan wì haq doi: “Bìac aih con mangai broq ùh jah, mahaq bìac aih Boc Plình broq jah, ma jah 'màng aih Boc Plình broq jah rìm bìac.”

²⁸ Tajòì 'mòi Pêtrô doi ca Chuaq Jêxu: “Chuaq ôi, nhèn khoi cađac dìq dõng òòiq tiaq ìh.”

²⁹ Chuaq Jêxu padreo hlài bàu doi: “Jòq 'nàng Au doi ca pì: Mangai ma khoi cađac dèh hnem, oh daq, miq baq, con caiq, wa òùng taneh taiq haq tiaq Au wa tiaq Bàu Lem, ³⁰ haq jah yõc hlài dìq bìac aih, òi ta 'nhòng manàiq, bình hrinh yàng yi hnao ca hnem, oh daq, miq, con, òùng taneh, bìac ti rùp wa can rìh hloi hloi ta 'nhòng atìq. ³¹ I bàc ngai adroi, loh atìq, mangai atìq, jah adroi.”

Yàng Piq Chuaq Jêxu Doi Adroi, Bìac Cachit Wa Rìh Hlài da Haq

(Mat 20:17-19; Luc 18:31-34)

³² Chuaq Jêxu wa mangai hóc tiaq Haq lam ti trong tõi phòq Jê-ru-sa-lem. Haq lam adroi 'nong gàu ca wì ma tiaq Haq. Wì haq loq hamàih wa yùq crè. Haq 'ràng dèh 12 ngai, mangai hóc tiaq nòi crài, èh Haq doi ca wì, Haq padon chiùq nan xa òi ta Jê-ru-sa-lem. ³³ Haq doi: “Cò èh bèn tõi ta Jê-ru-sa-lem, wì jao am Con Mangai ca 'bài pajàu ha'nhèq wa thài ranenh. Wì ta'mòq tôiq jêh đac Haq, jao am Haq ta tì 'bài mangai jàn 'noi. ³⁴ Wì lê Haq, cachòh ta chac Haq, blai Haq xam long roi, jêh Haq cachit. Ta hì piq, Haq rìh hlài.”

Baiq Toq Con Calô Xê-bê-đê

(Mat 20:20-28)

³⁵ Jacò wa Jon, con calô Xê-bê-đê, trùh ti Chuaq Jêxu wa bòch: “Thài ôi, xìn ìh am ca ma mòiq bìac ma ma xìn ìh.”

³⁶ Chuaq Jêxu doi: “Chòp xìn cleq?”

³⁷ Wa doi: “Jò ìh khoi 'ngah 'ngai ha'ngui ta gèq Bùa ta Diac Plinh, xìn ìh am ma ha'ngui ti ìh mòiq ngai pah 'ma, mòiq ngai pah 'ngeo.”

³⁸ Mahaq Chuaq Jêxu padreo hlài bàu doi: “Chôp ùh 'nì ca dađeh xìn cleq. Au ôq doi chrông mango, chôp hùa ôq ùh? Au chiùq 'baptem, chiùq nan xa, chiùq cachit, chôp hùa chiùq ti Au ùh?”

³⁹ Wa doi: “Ma hùa.”

Chuaq Jêxu doi: “Jôq 'nàng chôp jah ôq ti Au wa chiùq 'baptem tìa ca Au. ⁴⁰ Mahaq ha'ngui pah 'ma loq pah 'ngeo, Au ùh jah tiaq dèh manoh am ca chôp. Aih nòi padon đòiq ca mangai jah ràih enh adroi.”

⁴¹ Jò wì 10 ngai, mangai hõc tiaq ma 'noi q loq ca biac aih, wì loh nòih ca Jacò wa Jon. ⁴² Mahaq Chuaq Jêxu creò ca wì trùh, Haq doi: “Pì loq, 'bài mangai ma jah padèch broq gàu wa 'bài mangai jàn 'noi q, wì thê jàn ep iu wì haq, 'bài cwan yõc cwìang broq càn wèq cwìang jàn. ⁴³ Mahaq Au doi ca pì, pì ùh xài 'màng aih. Mangai leq enh broq càn òi ta pì, haq phai broq hapõng, ⁴⁴ wa mangai leq òi ti pì enh broq gàu, haq phai broq hapõng ca wì rìm ngai. ⁴⁵ Ma jah 'màng aih Con Mangai khoi trùh ùh xài đòiq wì patìh ca Haq, mahaq Haq trùh patìh ca wì. Haq cachit thai ca wì, mahem Haq jah rõt hlài bàc ngai.”

Mangai Ùh Xao Mat Òi Phôq Jê-ri-cô
(*Mat 20:29-34; Luc 18:35-43*)

⁴⁶ Atìq ca aih, Chuaq Jêxu, mangai hõc tiaq Haq wa mangai bàc lam trùh ta phôq Jê-ri-cô. I mòiq ngai ùh xao hiniq haq 'Ba-ti-mê, con calô Timê, ha'ngui caq xìn ti trong. ⁴⁷ Jò haq tàng wì doi, Chuaq Jêxu Mangai Na-xa-ret lam trùh, haq creò: “Ôi Chuaq Jêxu, Con Xau bùa Đawit, xìn xa-õch ca au diq.”

⁴⁸ Bàc ngai lech ca haq, thê haq hatenh, mahaq haq creo yi dêh tam: “Con Xau bùa Đawit ôi, xìn xa-ốch ca au dỉq.”

⁴⁹ Da'ngàc, Chuaq Jêxu hi ổi, thê wì 'ràng mangai aih trùh jang Haq.

Wì creo ca mangai ùh xao, doi ca haq: “Cajap manoh, yòng beq, Thài creo ca ìh.” ⁵⁰ Mangai ùh xao hwenh đac dèh eo enh gùng, hi yòng cadiang trùh ti Chuaq Jêxu.

⁵¹ Chuaq Jêxu bòch haq: “Ìh enh Au broq ca ìh bìac cleq?”

Mangai ùh xao doi: “Thài ôi, xìn am au jah hnoq.”

⁵² Chuaq Jêxu doi: “Lam beq, manoh ìh ma lùì Au, khoi broq brêh ca ìh.” Tajòi 'mòi haq jah hnoq, haq lam tiaq Chuaq Jêxu.

11

Wì Đìh Yốc Chuaq Jêxu Mùt Jê-ru-sa-lem

(Mat 21:1-11; Luc 19:28-40; Jon 12:12-19)

¹ Jò wì trùh plài 'Bê-t-pha-jê wa plài 'Bê-tha-ni ổi ta wang Ôliu ten trùh phôq Jê-ru-sa-lem, Chuaq thê baiq ngai, mangai hỏc tiaq lam adroi. ² Haq doi ca wa: “Chỏp mùt ta plài enh ngĩa ca chỏp 'mat beq. Jò chỏp mùt ta plài hnoq mòiq toq lùa con, 'nhòq i cabô còi, chỏp dỏih dùi 'ràng ca Au beq. ³ Tàng wì bỏch chỏp: ‘Gleq chỏp ma broq bìac 'mat?’ Chỏp doi: ‘Chuaq nheth ca haq. Tajòi 'mòi wì am chỏp dùi haq hlài ta cô.’”

⁴ Wa baiq ngai loh lam, hnoq mòiq toq lùa con wì cật enh gùng ca 'mang jang nòi trong tawech. Wa dỏih caxi dùi. ⁵ I 'bài mangai ổi ta aih bỏch wa: “Chỏp dỏih lùa con 'mat đòiq broq cleq?” ⁶ Wa padreo bàu tiaq bàu Chuaq Jêxu khoi tanap, èh wì am wa lam. ⁷ Wa dùi lùa con ahlài am ca Chuaq Jêxu, yỏc dèh eo hlèch enh crống lùa con, hi khoi, Chuaq Jêxu tỏc ha'ngui enh crống. ⁸ Bàc ngai hlèch

dèh eo ti trong lam. Mangai ma 'noiq coh hla long xap ti trong. ⁹ Mangai lam adroi wa mangai lam atìq rai lam rai cachech bàu dèh doi:

“Hô-sa-na manè apôi Boc Plình!”

“Atỗc 'bang Haq ma Boc Plình khoi thê trùh.”✠

¹⁰ “Waiq xỏq ramỗt ca Diac da bàu Đawit boc bèn. Hô-sa-na manè apôi Boc Plình ỏi ti nòi ha'nhềq!”

¹¹ Chuaq Jêxu trùh ta phỏq Jê-ru-sa-lem, mùt ta Hnem Cùh Waiq. Haq ti ngan rìm biac ỏi dudan ca Haq. Jò aih plình khoi xềq. Haq loh enh aih lam ta plài 'Bê-tha-ni pajùm ti 12 ngai, mangai hỏc tiaq.

*Long Pỗc Croh
(Mat 21:18-19)*

¹² Hì atìq, jò wì loh enh plài 'Bê-tha-ni, Haq pangot. ¹³ Jò ỏi enh hangai hnoq mòi q xèm long pỗc cràm hla, Haq thia ngan i plì ùh. Mahaq jò trùh haten, hnoq i toq hla, ma jah 'màng aih ùh xài jò plì pỗc. ¹⁴ Haq doi ca long pỗc: “Pàng cô ta èh pi cabô caq plì gè hòm.” Dìq ca mangai hỏc tiaq tàng bàu aih.

*Chuaq Hnan Đac Mangai Atech Loh Enh Hnem Cùh Waiq
(Mat 21:12-17; Luc 19:45-48; Jon 2:13-22)*

¹⁵ Trùh ta phỏq Jê-ru-sa-lem, Chuaq Jêxu mùt ta Hnem Cùh Waiq, hnan đac 'bài mangai padro ta aih, cachùt đac ca'bỗng 'bài mangai halìh 'bac, wa gềq 'bài mangai tech chìm trù. ¹⁶ Haq ùh am ca mangai leq jah wê dahwềq tech cleq lam pajang trong Hnem Cùh Waiq. ¹⁷ Khoi ca aih, Haq hnài wì: “Pì ma ùh loq Sech Hadròih khoi achìh

✠ 11:9 11:9 BCP 118:25,26.

'mòh? 'Hnem Au jah creò Hnem Waiq Khàn am òiq ca jàn, ✧ mahaq pì khoi broq loh 'còp mangai atùng.' ✧ ”

18 'Bàì pajàu ha'nhèq wa 'bài thài ranenh tàng bàu aih, wì chaq trong òòiq jêh đac Haq taiq wì crè ca Haq, ma jah 'màng aih òiq ca jàn tadroq ta manoh enh tamàng bàu hnài da Haq.

19 Trùh xèq, Haq wa mangai hóc tiaq loh khoi ca phòq.

20 Xrõih xroq hì atìq, wì haq lam ti aih, hnoq long póc khoi croh trùh ta riah. 21 Jò aih Pêtrô hmàng hlài biac hì nèh. Haq doi ca Chuaq Jêxu: “Thài ngan tau, long póc ìh ma hanip ca haq khoi croh.”

22 Chuaq Jêxu doi: “Phai i manoh lùì Boc Plình. 23 Joq 'nàng, Au doi ca pì, pì jah thê wang cô: ‘Tadèch, taclìh ta diac raxìq beq!’ Wang jah iu bàu pì. Tàng pì ùh hìaq hèm ra'ngòt ta manoh, wa pì lùì bàu pì doi jah wìa joq 'nàng, èh biac aih jah broq am ca pì. 24 Taiq 'màng aih Au doi ca pì: Rìm biac pì xìn jò waiq khàn, phai lùì dađeh khoi jah, èh rìm biac aih jah am ca pì. 25 Jò yòng waiq khàn, tàng pì i manoh nòih ca cabô, pì phai baxõng tòi q ca wì, òòiq Baq pì òi ta Diac Plình hadai baxõng tòi q ca pì.

26 “Tàng pì ùh baxõng tòi q wì, èh Baq pì òi ta plình hadai ùh baxõng tòi q pì.”

Bàu Bòch Cwìang da Chuaq Jêxu

(Mat 21:23–27; Luc 20:1–8)

27 Chuaq Jêxu wa mangai hóc tiaq wìh hlài ta Jê-ru-salem. Jò Chuaq Jêxu 'nang lam ba'yàt ta Hnem Cùh Waiq, i 'bài pajàu càn, 'bài thài ranenh wa 'bài craq broq gàu Yotheidaiq thia haten jang Haq. Wì bòch Haq: 28 “Yõc cwìang enh leq ìh broq biac cô? Cabô am ca ìh cwìang itai aih?”

29 Chuaq Jêxu doi: “Au hadai bòch pì mòi q nà, pì phai doi ca Au, Au men doi ca pì loq Au yõc cwìang enh leq broq

bìac aih. ³⁰ Jon yǒc cwiàng enh leq haq broq 'baptem, enh plình loq trùh enh con mangai? Doi ca Au beq."

³¹ Wì hatình ca dabau: "Tàng bèn doi: 'Trùh enh plình,' èh Haq doi: 'Gleq pì ùh lùì bàu Jon?' ³² Mahaq bèn ùh jah doi enh con mangai." (Wì crè ca mangai jàn, ma jah 'màng aih mangai leq ji lùì Jon, haq mangai capoch thai Boc Plình.)

³³ Wì doi ca Chuaq Jêxu: "Nhèn ùh 'nì."

Chuaq Jêxu doi ca wì: "Au hadai ùh doi ca pì loq Au yǒc cwiàng enh leq broq bìac cô."

12

Bàu Allah Mangai Broq ta Wùan Nho (Mat 21:33-46; Luc 20:9-19)

¹ Khoi ca aih Chuaq Jêxu yǒc bàu hnài àllah ca wì: "I mòiq ngai aih haq pìt mòiq wùan nho, càng pagia dudàn. 'Ne wùan haq broq mòiq toq nòi òòiq padit plì nho yǒc diac. Haq broq mòiq toq hnem gòm ha'nhèq. Hi khoi, haq jao wùan aih ca 'bài mangai ma broq ta wùan nho, èh cla haq lam hangai. ² Trùh jò loh plì, haq thê ðeh mòiq ngai hapǒng lam trùh ti 'bài mangai ma broq ta wùan plì nho, bòch wì axong am plì ca haq mòiq 'nah. ³ Mahaq wì mangai broq wùan rùp hapǒng aih, blai haq wa hnan haq hlài tì dech. ⁴ Khoi ca aih, cla craq wùan thê ðeh hapǒng ma 'noi q lam trùh. Wì mangai broq wùan tèm hmu habau gàu haq, hanip wa broq camaih ca haq. ⁵ Haq thê hapǒng ma 'noi q trùh. Wì jêh ðac. Èh bàc ngai hapǒng ma 'noi q hòm, tang ngai, wì jêh loh habau, tang ngai wì jêh ðac cachìt.

⁶ "Yàng ma atìq lùch, craq wùan nho thê ðeh con calô haq ma loq waq, lam trùh. Haq hèm: 'Joq wì loq iu haq, ma jah 'màng aih haq aih con calô cla craq.'

⁷ “Mahaq 'bài mangai ma broq ta wùan nho aih, hatình ca dabau: ‘Mangai cô con calô cla craq, bèn jêh đac haq cachit, èh cùng hang haq jah bèn.’ ⁸ Wì rùp con calô aih, jêh đac, hwenh 'noh đac enh gùng ca wùan.

⁹ “'Màng aih, èh craq wùan plì nho jah broq 'màng leq? Haq trùh jêh đac 'bài mangai ma broq ta wùan aih, khi èh, yốc wùan aih am ca mangai 'noi. ¹⁰ Pì ma 'nhòq đóc bàu cô ta Sech Hadròih 'mòh?

“Cato hmu thòq broq hnem ma dõih đac, cato hmu aih jah wìa hmu gàu mùm hnem.

¹¹ Boc Plình broq biac cô, aih biac halac enh ngìa ca mat bèn.”[☆]”

¹² 'Bài mangai broq gàu jàn Yothaiq chaq trong rùp Haq, ma jah 'màng aih wì loq Haq bàu aih alìah ca wì haq. Mahaq wì crè ca mangai jàn, èh wì loh lam.

Boc Plình wa Bùa Sêsa
(Mat 22:15-22; Luc 20:20-26)

¹³ Atìq ca aih, wì thê mangai Pha-ri-si wa mangai tiaq Hêrôt trùh chaq trong bahlac Chuaq Jêxu trong bàu capoch. ¹⁴ 'Bài mangai aih trùh haten bòch: “Thài ôi, nhèn loq ìh Mangai da biac joq 'nàng, ùh crè ca cabô, ma jah 'màng aih ìh ùh ngan enh gùng da con mangai, mahaq ìh hnài trong Boc Plình troq joq 'nang. Xìn ìh doi ca nhèn: Khòh am thèq ca Sêsa loq ùh?”

¹⁵ Chuaq Jêxu loq ca manoh dù da wì. Haq doi: “Pì bahlac broq cleq ca Au? Am ca Au ngan mòiq hliac 'bac beq.” ¹⁶ Wì am ca haq mòiq hliac 'bac. Haq bòch: “Cô 'mù cabô? Hiniq cabô?”

Wì doi: “'Mù Sêsa.”

¹⁷ Chuaq Jêxu doi: “Am hlài da Sêsa biac cleq da Sêsa, biac cleq da Boc Plình am hlài da Boc Plình.”

[☆] 12:11 12:11 BCP 118:22,23.

Dìq ca wì rìm ngai hamàih ca Haq.

Bàu Bòch Can Rìh Hlài
(*Mat 22:23-33; Luc 20:27-40*)

¹⁸ 'Bài mangai Sa-đu-sê, aih 'bài mangai ma doi ùh i ca can rìh hlài, thia haten bòch Haq: ¹⁹ “Thài ôi, Môise khai am ca bèn ranenh: Tàng mangai ổng cachit jò wa mai haq 'nhòq i con, 'màng aih oh haq phai yóc gu cadrì hadrô aih òng ha'mốt xinoi daq haq. ²⁰ Wì oh daq aih tapèh ngai. Baxèm daq wì haq yóc mai aih, khai èh haq cachit, mahaq ùh i ca con. ²¹ Mangai oh yóc gu cadrì hadrô aih, khai èh ji cachit, ùh i ca con, èh mangai ma oh hòm hadai 'màng aih. ²² Wì tapèh ngai dìq yóc mai aih mahaq dìq ùh i ca con. Hi khai gu cadrì aih hadai cachit. ²³ Xìn doi ca nhèn: Jò wì rìh hlài, gu cadrì aih jah broq mai mangai leq? Ma jah 'màng aih dìq ca wì khai yóc haq broq mai.”

²⁴ Chuaq Jêxu doi: “Pì khai hèm ùh troq. Pì ùh 'nì ca bàu Sech Hadròih, hadai ùh loq ca cwàng itai Boc Plình 'mòh? ²⁵ Ma jah 'màng aih trùh jò wì rìh hlài, wì pi yóc ổng pi yóc mai. Wì rìh tìah ca 'bình plình òi ta Diac Plình. ²⁶ Bìac mangai cachit rìh hlài, pì ùh i đóc, ta sech Môise i Bàu Boc Plình doi ca haq ta ramù long cheo: ‘Au Boc Plình Ap-ra-ham, Boc Plình Isac, Boc Plình Jacôp.’[☆] Pì ma 'nhòq đóc Bàu aih 'mòh? ²⁷ Haq aih Boc Plình da mangai rìh, ùh xài Boc Plình da mangai cachit. Joq 'nàng pì khai hèm ùh troq.”

Ranenh ma Yi Càn
(*Mat 22:34-40; Luc 10:25-28*)

²⁸ I mòiq ngai thài ranenh tàng Chuaq Jêxu wa mangai Sa-đu-sê tarahen ca dabau. Haq hnoq Chuaq Jêxu padreo hlài bàu dìq jaq rabiaq. Haq thia haten bòch Chuaq Jêxu: “Dìq ca bàu thê Boc Plình, bàu thê leq ma yi nhet dìq jaq?”

[☆] 12:26 12:26 LEA 3:6.

²⁹ Chuaq Jêxu padreo bàu doi: “Bàu thê ma yi nhet ðìq ðõng 'màng cô: ‘Ô mangai Is-ra-ên, tamàng beq! Chuaq, Boc Plình bèn, Haq Chuaq i mòiq raq hêq. ³⁰ Bèn phai loq waq ca Haq ðìq ca manoh, ðìq ca mahua yang, ðìq ca manoh hèm, wa ðìq ca padren.’[☆] ³¹ Bàu thê ma baiq 'màng cô: ‘Pì phai loq waq ca mangai haten hatìa tìah ca loq waq ca ðađeh.’[☆] Pì i ca bàu thê leq ma yi nhet ca baiq bàu thê cô.”

³² Thài ranenh padreo bàu doi: “Thài ôi, ìh doi troq. Joq 'nàng Boc Plình mòiq toq raq. Enh gùng ca Haq, pi i ca Boc Plình ma 'noiç hòim. ³³ Joq 'nàng khòh loq iu, loq waq ca Chuaq ðìq ca manoh, ðìq ca manoh hèm, ðìq ca padren, èh loq waq ca mangai haten hatìa tìah ca loq waq ca cla. Aih lem yi hnao ca am ngè tadreo bùh wa am ngè tadreo ma 'noiç.”

³⁴ Chuaq Jêxu hnoq haq capoch tìah ca mangai khôn. Chuaq Jêxu doi: “Ìh ùh hìaq hangai ca Diac Boc Plình.” Khoi ca aih pi i ca mangai leq hùa bòch Haq hòim.

Chuaq Jêxu Crich, Con Xau bùa Đawit

(Mat 22:41-46; Luc 20:41-44)

³⁵ Chuaq Jêxu yòng, hnài ta Hnem Cùh Waiç. Haq bòch wì: “Gleq 'bài thài ranenh doi, Crich, Haq Con Calô Đawit? ³⁶ Ma jah 'màng aih, Yang Hadròih khoi thê cla bùa Đawit doi:

“Chuaq doi ca Chuaq Au:

“Ha'ngui pah 'ma Au beq,
gòm trùh jò Au thê mangai

ma git ca ìh wìa long thòt òi enh 'neq ca capiang jènh ìh.”[☆]

³⁷ Cla bùa Đawit khoi creo ca Crich aih Chuaq, èh broq 'màng leq Haq ma wìa broq Con Calô Đawit?”

[☆] 12:30 12:30 RAH 6:4. [☆] 12:31 12:31 Lêwi 19:18. [☆] 12:36 12:36 BCP 110:1.

Dìq ca wì con jàn bùi ca tamàng bàu Chuaq Jêxu hnài 'màng aih.

³⁸ Jò Haq hnài wì, Haq doi: “Pì ep wèq dađeh. Apa q tia h ca wì thài ranenh ma enh caxùnh eo yôh lam dác jù, enh wì chao dađeh 'ne chòq. ³⁹ Wì haq enh ha'ngui gèq ma yi lem enh ngià òi ta hnem tagop. Wì ràih gèq am ca mangai broq càn jò caq hiniang. ⁴⁰ Wì yóc caq rôp cùng hang gu cadrì hadrô, wa wì loq enh waiq khàn ma dùnh enh ngià ca mangai bàc. Wì haq joq 'nàng 'bìq ta'mòq baxa èh yi trap tam.”

Gu Cadrì Hadrô Am 'Bac
(Luc 21:1-4)

⁴¹ Chuaq Jêxu ha'ngui ta jang ca thùng tah 'bac ta Hnem Cùh Waiq, ngan mangai jàn tah 'bac 'màng leq. ⁴² I bàc mangai can padrông tah bàc 'bac. Ta aih hadai i mòiq ngai, mangai gu cadrì hadrô pa, trùh tah baiq hliac 'bac.

⁴³ Chuaq Jêxu creò dèh ca mangai hóc tiaq, patô ca wì rai doi: “Joq 'nàng Au doi ca pì, gu cadrì hadrô cô khoi tah 'bac bàc yi hnao ca 'bài mangai ma khoi tah 'bac ta cô. ⁴⁴ Ma jah 'màng aih wì 'noi q yóc dèh 'bac rah wì tah ta cô, mahaq da gu cadrì cô haq khoi am đống dèh 'bac đòiq ban cla haq.”

13

Chuaq Jêxu Anoi Bìac 'Nhòng Pulùch
(Mat 24:1-2; Luc 21:5-6)

¹ Chuaq Jêxu bu loh khoi enh Hnem Cùh Waiq, i mòiq ngai, mangai hóc tiaq doi ca Haq: “Thài ôi, ngan tau, hmu ma broq hnem cô lem òiq jaq!”

² Chuaq Jêxu padreo bàu doi: “Ìh ngan 'bài hnem càn tau 'mòh? Cô èh, pi i ca pliang hmu leq raxon enh 'nhèq ca mòiq pliang hmu 'noi q hò m, jah tacro taclìh đống òiq.”

³ Jò Haq ha'ngui òi ti wang Ôliu, ta jang ca ngìa Hnem Cùh Waiq, Pêtrô, Jacò, Jon, wa Anrê thia bôch Haq jò i toq wì haq: ⁴ “Chuaq ôi, xin ìh doi ca nhèn, jò leq jah raliang hnem aih? I ca teo patò leq am loq jò leq biac aih jah trùh?”

⁵ Chuaq Jêxu doi: “Pì phai wèq dađeh. Apa q ðòi q ca mòiq ngai leq padô 'nùt pì. ⁶ I bàc ngai patìah ca hiniq Au lam trùh, wì doi: ‘Au cô raq Crich.’ Wì padô 'nùt bàc ngai. ⁷ Jò pì tàng wì anoi biac tajêh poh nòi haten, wa hìa tìn tajêh poh nòi hangai, apa q yùq ta manoh. Biac aih phai trùh, mahaq 'nhòq trùh jò lùch da crông taneh. ⁸ Ma jah 'màng aih mangai Diac cô tajêh ca mangai Diac 'noi q. Bùa Diac cô tajêh ca bùa Diac tau. Bàc nòi i taneh dalàc, bàc nòi i pangot hrah, aih bu baxèm biac nan xa.

⁹ “Phàn pì, pì phai wèq dađeh. Wì rùp pì 'ràng enh ngìa ca 'bài cra q hadrah ma enh 'nhèq. Wì blai pì ta hnem tagop taiq pì tiaq Au. Wì 'ràng pì enh ngìa chenh phù wa bùa, ðòi q pì anoi Bàu Lem Diac Plình enh ngìa ca wì haq. ¹⁰ Mahaq adroi ðông ðìq, Bàu Lem phai jah anoi 'noh jàp ca rìm jàn. ¹¹ Jò wì rùp pì, pì apa q lèt ep capoch cleq, mahaq trùh jò aih, Boc Plình jah am ca pì bàu capoch, ma jah 'màng aih, ùh xài pì capoch dèh bàu, mahaq Yiang Hadròih am pì bàu capoch.

¹² “Đaq blòq oh, ba q blòq con, con tajraq hlài dèh ca miq baq, broq waq ca wa haq cachìt. ¹³ Taiq hiniq Au ðìq ca phù crông git ca pì, mahaq mangai leq cajap manoh trùh hì ma lùch, mangai aih jah dèch.

'Nhòng Nan Xa Càn

(Mat 24:15-28; Luc 21:20-24)

¹⁴ “Mahaq jò pì hnoq 'biac raliang ranàc 'mèq 'mac’[☆] trùh ta nòi ma ùh khòh trùh (mangai leq ðóc phai loq 'nì),

[☆] 13:14 13:14 Đan 9:27; 11:31; 12:11.

'màng aih 'bài mangai ỏi ta gùng Judia cadàu mot ta wang beq! ¹⁵ Mangai leq ỏi ta của po, apaq loh yóc dahwèq cleq ta hnem. ¹⁶ Ma leq ỏi ta ðùng, apaq wih hlài yóc dèh eo. ¹⁷ Ta 'bài hì aih nan xa ca gu cadrì ỏi jiang wa gu cadrì 'nang am con ùq. ¹⁸ Waiq khàn xin ca biac aih ùh trùh jò ralìm. ¹⁹ Ma jah 'màng aih, ta 'bài hì aih i biac nan xa càn, enh jò baxèm Boc Plinh broq crõng taneh trùh manàiq, 'nhòq lah i biac 'màng aih, wa atìq cô èh ji pi i hòm.

²⁰ “Tàng Boc Plinh ùh broq 'nhòng nan xa aih yi ðêq, ùh i mòiq ngai leq jah ỏi rìh, mahaq taiq i 'bài mangai Haq khoi ràih, 'màng aih Haq khoi broq 'nhòng aih yi ðêq. ²¹ Jò aih, 'nhac ca i cabô doi ca pì: ‘Cô Crich,’ loq ‘Haq ỏi jang tau, pì apaq lùì,’ ²² ma jah 'màng aih i 'bài crich amòng wa mangai amòng capoch bàu loq adroi. Wì broq biac halac ðòiq padô 'nùt. Tàng jah, wì enh padô hloi 'bài mangai Boc Plinh khoi ràih. ²³ Wèq dađeh oq, ma jah 'màng aih Au khoi doi adroi ca pì biac aih.

²⁴ “Ta 'bài hì aih, atìq ca 'nhòng nan xa càn,
 “‘mat mahì loh ca clam,
 mat khê pi ngah hòm.

²⁵ Mat halõng enh plinh taclìh,
 cwìang itai ỏi ta plinh tadroq ðêh.”☆

²⁶ “Jò aih mangai jah hnoq Con Mangai lam trùh ỏi ti yùc plinh wa ti 'ngah lem i cwìang itai càn. ²⁷ Khoi èh Haq thê wì 'bình plinh lam enh nòi mat mahì loh trùh nòi mat mahì mùt, enh gàu plinh trùh cloh plinh, tagop hlài con jàn ma Boc Plinh khoi ràih.”

Chuaq Jêxu Hnài Biac Long Põc

(Mat 24:32-35; Luc 21:29-33)

²⁸ “Pì khòh hõc waq ca loq bàu aliah ca long põc beq. Jò hamenh haq loh hamõng chet hla, aih patô am ca pì

☆ 13:25 13:25 Êsai 13:10; 34:4.

loq khoi padon trùh jò padrang. ²⁹ Hadai 'màng aih, jò hnoq biac aih trùh, pì loq Con Mangai khoi trùh haten òi ti 'mang. ³⁰ Joq 'nàng, Au doi ca pì, xinoi ma rìh jò aih 'nhòq cachit adroi ca biac aih trùh. ³¹ Plình crông taneh jah hnhung đac, mahaq bàu Au ùh jò leq hnhung.”

*Ừh i Mangai Leq Loq ca Hì Loq Jò
(Mat 24:36-44)*

³² “Ừh i ca mangai leq loq jò leq, hì leq biac aih jah trùh, 'nhac ca 'bình plình òi ta plình loq Con hadai, toq Baq raq ma loq. ³³ Pì phai wèq dađeh, phai rìu gòm, ma jah 'màng aih pì ùh loq jò leq biac aih jah trùh. ³⁴ Biac aih tìah ca mòiq ngai i biac lam hangai, đòiq dèh hnem ca 'bài hapõng mòiq ngai broq mòiq biac, èh haq ji thê mòiq ngai gòm 'mang rìu gòm.

³⁵ “Pì phai rìu gòm, ma jah 'màng aih pì ùh 'nì ca craq hnem hlài jò leq, jò chiu, jò 'ne mang, jò ia rõng, loq jò xrõih xroq, ³⁶ èh yùq craq ta'ngac hlài hnoq pì 'nang cùi. ³⁷ Bàu Au doi ca pì, Au hadai doi am ca rìm ngai, phai rìu gòm.”

14

*Wì Chuaq Trong Rùp Jêh Đac Chuaq Jêxu
(Mat 26:1-5; Luc 22:1-2; Jon 11:45-53)*

¹ Baiq hì adroi ca Lè Lam Cwa wa Lè 'Benh Òh Tah Blo, 'bài pajàu ha'nhèq wa 'bài thài ranenh pađim ca dabau rùp hlèp Chuaq Jêxu đòiq jêh đac Haq. ² Ma jah 'màng aih wì doi: “Ừh khòh broq biac cô ta 'bài hì lè, yùq loq loh biac manhài ta mangai jàn.”

*Gu Cadrì Xùt Dàu Chuaq Jêxu ta 'Bê-tha-ni
(Mat 26:6-13; Jon 12:1-8)*

³ Chuaq Jêxu ỏi ta 'Bê-tha-ni ta hnem Simôn, mangai ma adroi nèh bacùn. Jò haq ha'ngui acaq, i mòiq ngai gu cadrì cadiang mùt, wê mòiq cabi dàu broq xam ngốc tah jreo xua thùm canaq 'bac. Haq tùq padah cabi dàu aih, ùc dàu xua thùm ta gàu Chuaq Jêxu.

⁴ I toq 'biaq ngai loh nòih, wì ta anoi ca dabau: “Gleq ma pa'ngwan cadàu canaq 'bac 'màng 'mat? ⁵ Ma jah 'màng aih dàu 'mat tech jah piq hrinh ê-nà-ri òòiq jùp òò wì mangai pa.” Hi khi, wì trech mangai cadrì aih.

⁶ Mahaq Chuaq Jêxu doi: “Òòiq da haq beq, gleq pì ma lech ca haq? Haq khi broq bìac lem am ca Au. ⁷ Ma jah 'màng aih 'bài mangai pa ỏi yôt ti pì.✠ Pì enh jùp òò wì haq jò leq xôq jah, mahaq Au ùh jah ỏi hloi ti pì. ⁸ Gu cadrì cô khi broq bìac haq broq jah. Haq khi xùt dàu ta chac Au adroi ca catùh Au. ⁹ Joq 'nàng, Au doi ca pì, jàp cởng taneh, nòi leq Bàu Lem cô jah anoi 'noh, bìac gu cadrì cô ma broq hadai jah bahmàng hlài òòiq hmàng trùh ca haq.”

Mangai Blòq Chuaq

(Mat 26:14-16; Luc 22:3-6)

¹⁰ Ỏi ta 12 ngai, mangai hỏc tiaq, i mòiq ngai hiniq haq Juda Ich-ca-ri-ôt trùh ta nòi 'bài pajàu ha'nhềq òòiq blòq Chuaq Jêxu. ¹¹ Wì lem bùi jò wì tàng bìac aih. Wì hùaq am ca haq 'bac. Khi èh, Juda gòm trùh i jò ta'nài jah blòq Chuaq.

Caq Lè Lam Cwa

(Mat 26:17-25; Luc 22:7-14,21-23; Jon 13:21-30)

¹² Hì baxèm da Lè 'Benh Ûh Tah Blo, aih hì wì tadreo trùu con, tiaq ranenh Lè Lam Cwa, mangai hỏc tiaq bòch Chuaq Jêxu: “Thài ôi, enh nhèn lam padon ca ìh caq Lè Lam Cwa ta nòi leq?”

✠ 14:7 14:7 RAH 15:11.

¹³ Haq thê dèh baiq ngai, mangai hóc tiaq lam. Haq tanap ca wa: “Jò chòp mùt ta phòq, chòp glàm mòiq ngai, mangai côi cabi diac, chòp lam tiaq haq oq. ¹⁴ Haq mùt hnem leq, chòp mùt hnem aih. Khoi èh, chòp doi ca craq hnem aih: “Thài bòch adùq ma òiq ca Au caq Lè Lam Cwa dèh ti mangai hóc tiaq, aih jang leq?” ¹⁵ Khoi èh mangai aih patô am ca chòp adùq anòh anai òi ta làu, khoi i tòm tàu ngè dahwèq. Chòp padon caq ta aih beq.”

¹⁶ Wa mangai hóc tiaq baiq ngai loh lam mùt ta phòq wa glàm rìm biac tìah troi bàu Chuaq Jêxu khoi doi. Khoi èh wa padon lè òiq ta hnem aih.

¹⁷ Trùh chiu, Haq trùh ti 12 ngai, mangai hóc tiaq. ¹⁸ Jò 'nang ha'ngui caq, Chuaq Jêxu doi: “Jòq 'nàng, Au doi ca pì, òiq ca pì ma ha'ngui caq ti Au, cô èh i mòiq ngai blòq Au.”

¹⁹ 'Bài mangai hóc tiaq loh mango òiq jaq. Tang ngai mòiq, wì bòch Haq: “Thài ôi, hìaq au ùh?”

²⁰ Haq doi: “Aih mòiq òi ta 12 ngai, i mòiq ngai hnhu tì ta màm adrình ca Au. ²¹ Ma jah 'màng aih, Con Mangai cachit tiaq troi Sech Hadròih khoi achìh biac Haq, mahaq nan xa ca mangai leq ma blòq Con Mangai. ùh xa-ông loh ca mangai aih yi lem.”

Lè Hiniang Hadròih

(Mat 26:26-30; Luc 22:14-20; 1Cò 11:23-25)

²² Jò 'nang acaq, Chuaq Jêxu yóc 'benh, manè pôi Boc Plình, khoi èh goh am ca 'bài mangai hóc tiaq rai doi: “Yóc beq, cô chac hamac Au.”

²³ Haq yóc doi chrõng, manè pôi Boc Plình, khoi èh, am ca 'bài mangai hóc tiaq. Ma leq ji ôq doi chrõng aih.

²⁴ Haq doi: “Cô mahem Au. Mahem da biac wêh jao ta-ùc thai ca bacc ngai. ²⁵ Jòq 'nàng, Au doi ca pì: Au pi ôq diac plì nho cô hòm, trùh hì Au jah ôq diac plì nho neo òi ti Diac Boc Plình.”

²⁶ Jò khoi calêu 'bôi Hadròih, Chuaq Jêxu wa mangai hóc tiaq loh lam tǒc wang Ôliu.

Chuaq Doi Adroi Pêtrô Chôiq Haq

(*Mat 26:31-35; Luc 22:31-34; Jon 13:36-38*)

²⁷ Chuaq Jêxu doi ca mangai hóc tiaq: “Cô èh òiq ca pì catõih cro, ma jah mang aih i bàu Boc Pliñh khoi achìh: “‘Cô èh, Au jêh Mangai ban trùu,

èh trùu cadàu tac mac.’[☆]

²⁸ Mahaq jò Au khoi rìh hlài, Au lam trùh ta gùng Ga-li-lê adroi ca pì.”

²⁹ Pêtrô doi: “'Nhac òiq ca wì catõih cro, mahaq au xôq ùh!”

³⁰ Chuaq Jêxu doi: “Jòq 'nàng, Au doi ca ìh. Mang cô adroi ca ia rǒng baiq yàng, ìh doi ùh loq ca Au.”

³¹ Mahaq Pêtrô doi: “'Nhac ca au cachìt ti ìh, au xôq ùh doi òiq ùh loq ca ìh.” Òiq ca mangai hóc tiaq 'noi q hadai doi 'màng aih.

Chuaq Jêxu Waiq Khàn ta Ghêt-sê-ma-nê

(*Mat 26:36-46; Luc 22:39-46*)

³² Khoi ca aih, wì lam trùh ta wùn Ghêt-sê-ma-nê. Chuaq Jêxu doi ðeh ca 'bài mangai hóc tiaq: “Pì ha'ngui gòm jang cô, Au lam waiq khàn.” ³³ Haq 'nong Pêtrô, Jacò, wa Jon lam ti Haq. Khoi èh Haq loh ca mango. ³⁴ Haq doi ca wì piq ngai: “Mahua yiang Au mango mech ten cachìt. Pì rìu gòm òi jang cô oq.”

³⁵ Hi khoi, Haq lam hangai ca nòi aih toq 'biaq, Haq hacùn cràng ti taneh waiq khàn doi: “Tàng jah, xìn jò cô cwa khoi ca Au.” ³⁶ Haq doi hòm: “Aba, waiq Baq, ìh broq jah rìm bìac. Xìn ìh òi hoi doi chrǒng cô khoi ca Con, mahaq ùh tiaq manoh Con, mahaq tiaq manoh enh Baq.”

[☆] 14:27 14:27 Xach 13:7.

³⁷ Haq hlài ti wì, hnoq wì cùi. Haq doi ca Pêtrô: “Simôn khoi cùi 'mòh? Ìh ùh riu ti Au jah mòiq jò 'mòh? ³⁸ Rìu gòm waiq khàn beq, òòiq pì ùh hìaq clih mùt ta trong padô 'nùt. Manoh enh, mahaq chac ùh nui ta'blêq.”

³⁹ Èh Haq lam hòm waiq khàn tiah ca yàng adroi. ⁴⁰ Haq hlài ta wì, hnoq wì cùi, ma jah 'màng aih mat wì khoi ra'bù hrìn. Wì pi 'nì tèo cleq ca Chuaq Jêxu.

⁴¹ Haq hlài hòm ta wì yàng piq, doi ca wì: “Jò cô pì xôq òi raq cùi padài 'mòh? Hêq, khoi trùh jò 'mùt Au ta tì mangai dù. ⁴² Yòng beq, bèn lam. Ngan tau, mangai blòq au khoi trùh.”

*Wì Rùp Chuaq Jêxu Ta Wùan Ghêt-sê-ma-nê
(Mat 26:47-56; Luc 22:47-53; Jon 18:3-12)*

⁴³ Jò Haq capoch tùang ca wì, tajòì 'mòì hnoq Juda mòiq ngai ta mangai hóc tiaq Haq, lam ti 'bài mangai wê chang, wê long dùì. 'Bài pajàu càn, 'bài thài ranenh, wa 'bài craq broq gàu Yothaiq thê wì trùh.

⁴⁴ Juda, mangai blòq Chuaq, khoi doi adroi ca wì 'màng cô: “Au hìp mangai leq, mangai aih raq pì rùp ma cajap dùì 'nong hloi beq.” ⁴⁵ Bu trùh, Juda aih thia hloi ti Chuaq Jêxu rai doi: “Thài ôi!” Khoi èh, hìp Haq. ⁴⁶ Wì rùp Chuaq Jêxu. ⁴⁷ I mòiq ngai yòng ten aih, haq dõih chang, tajêh ca hapõng pajàu ha'nhèq, põt taclìh ca don mangai hapõng aih.

⁴⁸ Chuaq Jêxu doi ca wì: “Pì wê chang, wê long dùì, lam rùp Au tiah ca pì rùp mangai atùng 'mòh? ⁴⁹ Au òi yôt tì pì, hnài pì ta Hnem Cùh Waiq, gleq pì ùh rùp Au?” Mahaq bìac cô trùh òòiq troq troi bàu Sech Hadròih khoi achìh. ⁵⁰ Jò aih, rìm ngai, mangai hóc tiaq cađac Haq. Wì cadàu mot.

⁵¹ I mòiq ngai gu radam lam tiaq Chuaq. Haq i mòiq blah bai briang lem òòiq clùm dađeh. Wì rùp haq, ⁵² mahaq

haq hatrêh dahlôch ca bai briang lem, claih ca tì wì, cadàu rahòng lam mot.

Chuaq Jêxu Ôi Enh Ngìa Pajàu Ha'nhèq

(Mat 26:57-68; Luc 22:54-55,63-71; Jon 18:13-14,19-24)

⁵³ Wì 'ràng Chuaq Jêxu trùh ta pajàu ha'nhèq. Dìq ca wì pajàu càn, 'bài craq broq gàu Yothaiq, wa 'bài thài ranenh tagop ta aih. ⁵⁴ Pêtrô tiaq ta'yoì atìq, trùh ta xàn hnem pajàu ha'nhèq aih. Haq ha'ngui 'nhìa ùnh pajùm ca wì lình gôc.

⁵⁵ Ôi ta aih, 'bài pajàu càn wa 'bài craq hadrah enh 'nhèq, chaq nen ðòiq i trong tajraq ca Chuaq Jêxu ðòiq jah jêh ðac Haq, mahaq chaq ùh jah. ⁵⁶ I bàc ngai capoch amòng 'mùt ca Haq, mahaq bàu wì haq ùh hatroq ca dabau.

⁵⁷ I 'bài mangai yòng capoch amòng 'mùt ca Haq. Wì doi: ⁵⁸ “Nhèn tàng Haq doi: ‘Au jah raliang ðac Hnem Cùh Waiq loh enh tì cõng con mangai broq, khoi èh, piq hì Au broq òn mòiq toq Hnem Cùh Waiq ùh xài loh enh tì cõng con mangai.’” ⁵⁹ Mahaq bàu wì ma anoi hlài biac cô, hadai ùh hatroq ca dabau.

⁶⁰ Wop jò aih, pajàu ha'nhèq, padinh yòng ta'ne mangai bàc, bòch Chuaq Jêxu: “Ìh ùh tèò hlài biac wì ma capoch ca ìh 'mòh?” ⁶¹ Mahaq Chuaq Jêxu òi hatenh, ùh tèò hlài.

Èh pajàu ha'nhèq aih bòch hòm: “Ìh Crich Con Calô Boc Pình ma ðang ca manè apôi joq ùh?”

⁶² Chuaq Jêxu doi: “Au joq 'nàng 'màng aih. Atìq èh pì jah hnoq Au ha'ngui pah 'ma Boc Pình i cwiàng itai, òi ti yùc pình loh ta cõng taneh.”

⁶³ Pajàu ha'nhèq aih hich dèh eo rai doi: “Bèn òi nhet dèh ca chaq hiniq ma 'noi q hò m? ⁶⁴ Pì i tàng bàu Haq capoch 'mèq ðùng trùh Boc Pình ùh? Pì hèm 'màng leq?”

Rìm ngai, wì doi Haq đàng ca cachìt. ⁶⁵ I tang ngai cachôh ca Haq, bàng mat Haq, jêh Haq, rai doi ca Haq: “Capoch bàu loq adroi beq. Cabô ma jêh ìh!” 'Bài lình hadai tep Haq.

Pêtrô Hangah Chuaq

(*Mat 26:69-75; Luc 22:56-62; Jon 18:15-18,25-27*)

⁶⁶ Pêtrô 'nang yòng ôi ta nôi xàn. I mòiq ngai gu cadrì patìh ca pajàu ha'nhèq, thia. ⁶⁷ Haq hnoq Pêtrô 'nhia ùnh, haq ngan ro rai doi: “Ìh hadai ôi ti Chuaq Jêxu Mangai Na-xa-ret.”

⁶⁸ Mahaq Pêtrô hangah doi: “Au ùh 'nì loq, hadai au ùh 'nì tàng ìh doi cleq.” Hi khoi, haq loh khoi ca nôi xàn, èh ia rông.

⁶⁹ Gu cadrì aih hnoq haq, doi hòm ca wì ma ôi ta aih: “Mangai cô hi loq ca bua Chuaq Jêxu.” ⁷⁰ Mahaq Pêtrô hangah mòiq yàng hòm.

Khoi ca aih toq biaoq, 'bài mangai ma ôi ti aih doi: “Jòq 'nàng ìh cô hi loq ca bua Chuaq Jêxu, ma jah 'màng aih ìh cô mangai Ga-li-lê.”

⁷¹ Pêtrô hanip rai doi: “Au ùh canao loq ca Mangai pì ma doi aih.”

⁷² Tajòì 'mòi, ia rông yàng baiq. Pêtrô hmàng hlài bàu Chuaq Jêxu khoi doi: “Adroi ca ia rông baiq yàng, ìh hangah ùh 'nì ca Au piq yàng.” Èh haq crò hmoi dìq jaq.

15

Chuaq Jêxu Ôi Jang Ngìa Philat

(*Mat 27:1-2,11-14; Luc 23:1-5; Jon 18:28-38*)

¹ Xrôih xroq, 'bài pajàu càn lam ti 'bài craq broq gàu, 'bài thài ranenh wa 'bài craq hadrah enh 'nhèq, pajùm ti 'bài mangai ma ôi ti aih. Wì rùp cật Chuaq Jêxu 'ràng Haq trùh ta Philat.

² Philat bòch Haq: “Ìh Bùa Yothaiq, jòq ùh?”

Chuaq Jêxu doi: “Joq.”

³ 'Bàì pajàu càn kian Haq bàc bìac. ⁴ Philat bòch Haq: “Gleq ìh ùh tèò bàu? Wì kian ìh bàc trong.”

⁵ Mahaq Chuaq Jêxu pi capoch hòm, taiq 'màng aih Philat hamàih.

⁶ Trùh hì Lè Lam Cwa, tiaq lè troi rìm hanam adroi, haq ca'naih mòiq ngai, mangai broq tôiq, loh enh tù, hi mac ca mangai jàn xin thê ca'naih mangai leq. ⁷ Jò aih i mòiq ngai hiniq haq 'Ba-ra-ba, mangai pajùm ca wì ma 'noiç broq manhài enh tablah ca chenh phù wa pòq tôiq jêh đac mangai. ⁸ Mangai jàn trùh, xin Philat broq am ca wì tiaq haq khoi loq broq adroi.

⁹ Philat padreo bàu doi: “Pì enh au ca'naih ca pì Bùa Yothaiç ùh?” ¹⁰ Ma jah 'màng aih, haq khoi loq ca 'bài pajàu càn rùp Haq, aih taiq wì ta'mrua ta'bì ca Haq. ¹¹ Mahaq 'bài pajàu càn jrôç chiu mangai jàn, xin Philat thê ca'naih ca wì haq 'Ba-ra-ba.

¹² Philat bòch hòm: “Manàiq cô pì enh au broq ca Mangai pì ma doi Haq bùa Yothaiç cô 'màng leq?”

¹³ Wì cachech bàu dêh doi: “Tiang đình Haq ta long pagat!”

¹⁴ Philat doi ca wì: “Mahaq Mangai cô khoi broq bìac dù leq?”

Wì cachech yi dêh hòm: “Tiang đình Haq ta long pagat beq!”

¹⁵ Philat enh waq ca lem manoh jàn. Haq ca'naih ca wì 'Ba-ra-ba, thê wì blai Chuaq Jêxu wa jao am ca wì tiang đình Haq ta long pagat.

'Bàì Lình Jù Lê Chuaq Jêxu

(Mat 27:27-31; Jon 19:2-3)

¹⁶ 'Bàì lìn Rôma dùì 'ràng 'mùt Chuaq Jêxu ta xàn hnem hadrah cwan trùang, aih hnem càn nòi broq bìac

da Philat, wì hi creò dìq ca 'bài lình tagop ta aih. ¹⁷ Wì haq caxùnh ca Chuaq Jêxu mòiq blah eo nhum gòh drinh, khoi èh wì tenh tùn hila broq cadoh pacôh ca Haq. ¹⁸ Hi khoi wì lê Haq doi: “Waiq Bùa Yothaiq.” ¹⁹ Wì yòc long cadia hwat gàu Haq, cachôh ca Haq diac hai, hi khoi hacùn cràng cùh lê Haq. ²⁰ Khoi ca wì do lê Haq, wì lêh đac eo gòh drinh, caxùnh hlài da Haq eo. Wì 'nong Haq lam òiđiq tiang đình Haq ta long pagat.

Chuaq Jêxu ta Long Pagat

(*Mat 27:32-44; Luc 23:26-43; Jon 19:17-27*)

²¹ Jò aih i Simôn, mangai Siren, haq baq da A-lec-xan-đò wa Ruphu, enh plài 'nang tọc Jê-ru-sa-lem lam trong aih. Wì rùp haq xùì long pagat thai Chuaq Jêxu. ²² Wì 'ràng Chuaq Jêxu trùh ta nòi go, doi Gô-gô-tha, i hiniq Go Cadôh. ²³ Wì am ca Haq ôq alac alôn ca mùc jùac, mahaq Haq ùh waq ôq. ²⁴ Wì tiang đình Haq ta long pagat wa wì adrác dabau pàih panàih troq ca mangai leq jah yòc eo Haq.

²⁵ Wì tiang đình Haq wop hachìn jò daxroq. ²⁶ I mòiq capiac long ban enh 'nhèq jang gàu Haq, i bàu achìh: “Cò Bùa Jàn Yothaiq.”

²⁷ I baiq ngai mangai atùng hadai 'bìq wì đình ti Haq, mòiq ngai pah 'ma Haq, mòiq ngai pah 'ngeo Haq. ²⁸ Tiaq troi bàu Sech Hadròih khoi achìh: “Haq 'bìq ta'mòq pajùm ti mangai dù.” ²⁹ I mangai lam cwa trong aih, wì ngu ngiù gàu lê Haq, rai doi: “Ê! ìh doi dađeh raliang đac Hnem Cùh Waiq, èh broq hlài piq hi gêh, ³⁰ dèch dađeh beq, loh khoi enh long pagat beq!” ³¹ 'Bài pajàu càn wa thài ranenh hadai doi ca dabau 'màng aih. Wì lê Haq: “Haq khoi dèch mangai 'noi, mahaq ùh jah dèch dađeh. ³² Ôi Crich, Bùa Is-ra-ên, loh khoi enh long pagat beq òiđiq nhèn hnoq, nhèn jah lùì!” Baiq ngai atùng wì ma tiang đình ti Haq, hadai lê Haq.

*Chuaq Jêxu Cachit**(Mat 27:45-56; Luc 23:44-49; Jon 19:28-30)*

³³ Enh 12 jò trùh piq jò chiu, diq ca gùng aih clam clôiq.

³⁴ Wop piq jò chiu, Chuaq Jêxu creò bàu dêh doi: “Ê-lô-i, Ê-lô-i, La-ma-sa-bach-tha-ni?” Aih: “Ôi Boc Plình Au, ôi Boc Plình Au, gleq ìh ma cađac Au?”[☆]

³⁵ I toq 'biaq ngai ma yòng jang aih, tàng bàu aih, wì doi: “Tamàng aih, Haq creò ca Êli.”

³⁶ I mòiq ngai cadàu yỏc capaih chùq ta diac jòq, òdiq abôi long blùm, hnhu ca Haq ôq, rai doi: “Gòm oq, bèn hi ngan thù tàng Êli trùh đõih Haq loh.”

³⁷ Mahaq Chuaq Jêxu creò mòiq nà bàu dêh, khoi èh Haq pat hihèm.

³⁸ Bai prình ta Hnem Cùh Waiq dahich broq baiq, enh 'nhèq trùh ta 'neq. ³⁹ Mangai ma wèq lình yòng ta jang ca Chuaq Jêxu, hnoq Chuaq Jêxu pat hihèm 'màng aih, haq doi: “Mangai cô joq 'nàng Con Boc Plình.”

⁴⁰ Hadai i 'bài gu cadrì yòng ngan enh hangai. Ta aih i Mari Ma-đò-len, Mari miq da Jacò 'yoh, da Jôse wa Sa-lô-mê. ⁴¹ Aih wì piq ngai khoi tiaq patìh ca Haq jò Haq ôi ta Ga-li-lê. Hadai i 'bài gu cadrì ma 'noiq, aih 'bài mangai khoi tiaq Haq tỏc phỏq Jê-ru-sa-lem.

*Bìac Catùh Chuaq Jêxu**(Mat 27:57-61; Luc 23:50-56; Jon 19:38-42)*

⁴² Trùh chiu xèq, aih hì padon adroi ca hì Sabat. ⁴³ Jôsep, mangai A-ri-ma-thê, mòiq ngai ta 'bài mangai broq càn ôi ta jàn Juđà. Haq hadai mangai gòm canòm ca Diac Boc Plình. Haq hùa lam trùh glàm Philat òdiq xìn hanang Chuaq Jêxu. ⁴⁴ Philat hamàih Haq khoi cachit, ma jah haq thê creò mangai ma wèq lình trùh, bỏch thù Haq cachit akhoi dùnh. ⁴⁵ Jah loq enh mangai ma wèq gàu lình

[☆] 15:34 15:34 BCP 22:1.

doi Haq khoi cachit, Philat ma am hanang aih ca Jôsep.
⁴⁶ Jôsep khoi rôt bai briang lem. Haq yôc 'noh xom hanang
 Chuaq Jêxu, khoi êh, ðoìq Haq ta ralùng hanang khoi pùng
 ta hmu. Hi khoi, cadre mòiq toq hmu càn gúp anòì ngah
 ralùng. ⁴⁷ Mari Ma-ðò-len wa Mari, miq Jôse, hnoq nòì
 catùh Haq.

16

Bìac Chuaq Jêxu Rìh Hlài

(Mat 28:1-8; Luc 24:1-12; Jon 20:1-10)

¹ Atiq ca hì Sabat, Mari Ma-ðò-len, Mari miq Jacò wa
 Sa-lô-mê, rôt dahwèq xua thùm lam xùt ca hanang Chuaq
 Jêxu. ² Xrõih xroq hì gàu tùang lè, mat mahì bu tọc,
 wì piq ngai lam trùh ta ralùng hanang. ³ Wì ta anoi ca
 dabau: “Cabô ma cadre am ca bèn hmu càn gúp jang ngah
 ralùng?”

⁴ Ma jah 'màng aih hmu aih càn. Mahaq jò wì ngan,
 wì hnoq hmu khoi cadre. ⁵ Êh wì mùt hnoq mòiq ngai gu
 radam ha'ngui pah 'ma, caxùnh eo yôh taboc camla, wì
 crè.

⁶ Mahaq gu radam aih doi ca wì: “Apaq crè oq. Pì chaq
 Chuaq Jêxu, Mangai Na-xa-ret ma wì khoi tiang ðinh Haq
 ti long pagat. Haq khoi rìh hlài. Haq pi òi ta cô. Meh pì
 lam ngan nòì wì ma prôih hanang Haq beq. ⁷ Lam doi ca
 'bài mangai hõc tiaq Haq wa Pêtrô loq, Haq lam ta Ga-li-lê
 adroi ca pì. Pì jah hnoq Haq ta aih, troi bàu Haq khoi doi
 ca pì.”

⁸ 'Bài gu cadrì aih loh enh ralùng. Wì lam mot, ma jah
 'màng aih, wì crè ðìq jaq. Wì haq ùh i doi ca mangai 'noi q
 loq, taiq wì haq crè.

Bìac Chuaq Jêxu Patô Dadeh

(Mat 28:9-10; Jon 20:11-18)

⁹ Chuaq Jêxu rih hlài jò daxroq hì gàu tùang lè. Adroi dǒng dìq Chuaq Jêxu patô dađeh ca Mari Ma-đò-len, aih mangai Chuaq Jêxu khoi hnan tapèh toq kiac dù enh chac haq. ¹⁰ Haq lam bahìa ca 'bài mangai ma khoi tiaq Chuaq Jêxu enh adroi. Wì 'nang hmoi ca Chuaq Jêxu cachìt. ¹¹ Mahaq jò tàng haq doi haq khoi hnoq Chuaq Jêxu khoi rih hlài, wì ùh lùì.

Chuaq Jêxu Patô Dađeh ca Baiq Ngai

(Luc 24:13-35)

¹² Atìq ca aih, Chuaq Jêxu patô dađeh ca wa baiq ngai, mangai hǒc tiaq ti trong hlài đeh ta plài. ¹³ Wa lam anoi hlài ca 'bài mangai hǒc tiaq 'noiq, mahaq wì hadai ùh lùì wa.

Chuaq Jêxu Patô Dađeh ca Mangai Hǒc Tiaq

(Mat 28:16-20; Luc 24:36-49; Jon 20:19-23; BYH 1:6-8)

¹⁴ Atìq ca aih hòm, Chuaq Jêxu patô dađeh ca 12 ngai, mangai hǒc tiaq 'nang ha'ngui acaq. Haq lech ca wì taiq manoh wì cadoq, taiq wì ùh lùì Haq khoi rih hlài, ma jah 'màng aih wì ùh lùì 'bài mangai ma khoi hnoq Haq khoi rih.

¹⁵ Haq doi ca 'bài mangai hǒc tiaq: “Lam jàp ca crǒng taneh beq, anoi Bàu Lem am ca rìm ngai loq. ¹⁶ Mangai leq lùì wa chiuq 'baptem, haq jah dèch. Mangai leq ùh lùì, mangai aih jah chiuq hadrah baxa. ¹⁷ 'Bài mangai leq lùì jah i bìac halac cò: Canòm ca hiniq Au wì hnan đac kiac dù, jah capoch bàc bàu neo, ¹⁸ rùp bìh ta tì; tàng troq ôq padrê, ji ùh hìaq troq cleq; òđìq tì ti chac mangai ùh hrǒc, èh mangai ùh hrǒc jah brêh.”

Chuaq Jêxu Tǒc ta Plình

(Luc 24:50-53; BYH 1:9-11)

¹⁹ Khoi ca Chuaq Jêxu doi dìq bàu aih, Haq tǒc ta plình. Haq ha'ngui pah 'ma Boc Plình. ²⁰ Phàn da 'bài mangai hǒc

tiaq, wì loh lam anoi Bàu Lem jàp rìm nòi. Chuaq hadai broq pajùm dèh ti wì haq. Bàu Lem khi jah broq hagao nhò biac halac aih.

Sech Hadròih
Sech Hadròih

Copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo
All rights reserved.

2020-11-17

PDF generated using Haiola and XeLaTeX on 11 Feb 2021 from source files dated 10 Feb 2021

e5023a07-9831-5256-a315-1cae0f33043d